

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI SELASA : 3 DISEMBER 2019

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 3 DISEMBER 2019 (SELASA)

SOALAN NO. 01

Minta **MENTERI PENDIDIKAN** menyatakan apakah terdapat peruntukan untuk mengecualikan atau memberikan subsidi yuran pendaftaran bagi golongan anak asnaf atau golongan B40 bagi kategori sekolah dan universiti awam.

JAWAPAN

Tuan Yang di-Pertua,

Untuk makluman Ahli Yang Berhormat, yuran persekolahan di peringkat pendidikan rendah dan menengah di sekolah kerajaan dan sekolah bantuan kerajaan telahpun dimansuhkan. Pendidikan di kedua-dua peringkat persekolahan tersebut adalah percuma sepenuhnya. Selain daripada tiada yuran persekolahan yang dikenakan, Kementerian juga menyediakan 3 kategori Bantuan Persekolahan iaitu:

1. Bantuan Persekolahan Umum;
2. Bantuan Persekolahan Khusus; dan
3. Bantuan Persekolahan *One-off*.

Secara keseluruhannya terdapat 18 jenis bantuan di bawah ketiga-tiga kategori bantuan tersebut.

Bantuan Persekolahan Umum

Bantuan Persekolahan Umum diberi kepada semua pelajar meliputi Bantuan Geran Per Kapita, Bantuan Geran Per Kapita Prasekolah, Bantuan Bayaran Makanan Prasekolah, Bantuan Bayaran Tambahan Persekolahan dan Bantuan Sukan Sekolah. Bantuan-bantuan ini diberikan kepada semua murid tanpa mengira kumpulan pendapatan isi rumah sekaligus mengurangkan beban sedia ada yang ditanggung oleh golongan asnaf atau kumpulan isi rumah 40 peratus terendah ataupun lebih dikenali sebagai B40.

Bantuan Persekolahan Khusus

Terdapat 12 jenis di bawah Bantuan Persekolahan Khusus bagi membantu kumpulan sasar mengikut kriteria sebagai contoh Bantuan Pakaian Seragam Beruniform, Bantuan Jaket Keselamatan, Bantuan Kumpulan Wang Amanah Pelajar Miskin (KWAPM), Elaun Murid Berkeperluan Khas dan Elaun Pra Universiti. Kementerian juga melaksanakan Projek Khas Sekolah Berasrama Penuh iaitu peruntukan kewangan kepada pelajar miskin bagi membiayai keperluan kewangan meliputi yuran persekolahan, yuran peperiksaan, yuran asrama dan juga menyediakan keperluan asas sepanjang mereka bersekolah di asrama penuh.

Bantuan Persekolahan *One-Off*

Pada tahun 2019 Bantuan Awal Persekolahan ini diberikan kepada murid sekolah yang berkeperluan bagi meringankan beban perbelanjaan persekolahan pada awal tahun yang ditanggung oleh ibu bapa ataupun penjaga. Secara keseluruhannya, jumlah peruntukan Bantuan Persekolahan bagi tahun 2020 meningkat kepada **RM3.478 bilion** berbanding dengan **RM3.021 bilion** pada tahun 2019.

Peringkat Pendidikan Tinggi

Manakala, di peringkat pendidikan tinggi pula, pendidikan yang disediakan adalah hampir percuma iaitu pelajar hanya membayar 10 peratus sahaja daripada kos operasi. Ini bermakna, setiap pelajar

NO. SOALAN : 1

universiti awam secara tidak langsung menerima 90 peratus subsidi daripada Kerajaan. Kerajaan sedang dalam usaha mempertimbangkan cadangan memberikan pendidikan percuma sepenuhnya agar dapat mengurangkan beban rakyat mendapatkan hak pendidikan. Walau bagaimanapun, penumpuan akan lebih diberikan kepada golongan sasaran iaitu golongan B40 dan juga mereka yang memerlukan bantuan seperti golongan OKU, golongan minoriti dan mereka yang kurang bernasib baik. Kerajaan juga sedang berusaha memastikan setiap bantuan yang diberikan akan memberikan impak yang substantif dan juga melakarkan masa depan yang baik kepada Negara.

Beberapa model sedang dipertimbangkan dan pengiraan terperinci berkaitan perkara ini perlu dilaksanakan bersama dengan Kementerian Kewangan dan universiti awam untuk menampung kos tambahan ini. Inilah cabarannya kerana bagi pihak KPM kita inginkan yang terbaik bagi pihak rakyat. Namun ianya perlu dilaksanakan bersama-sama dengan pihak-pihak yang lain dengan melihat keperluan universiti awam dan juga dengan melihat keutamaan yang diberikan oleh Kementerian Kewangan terhadap perbelanjaan Negara.

KPM kini menawarkan Program Bantuan Kewangan kepada pelajar Kolej Komuniti dari keluarga berpendapatan RM3,000 sebulan dan juga pelajar asasi di 12 universiti awam seluruh Malaysia untuk syarat kelayakan dari keluarga B40 dan M40. Kedua-dua program bantuan kewangan ini merangkumi bayaran yuran pengajian, elaun penginapan pelajar Asasi dan bantuan wang saku berjumlah RM300 sebulan. KPM turut menyediakan bantuan kewangan kepada pelajar Orang Kurang Upaya (OKU) dan juga disebutkan sebagai orang kelainan upaya, dan program pendidikan khas untuk pelajar pekak dan bisu yang mengikuti pengajian di beberapa Kolej Komuniti terpilih. Kita tidak mahu ada pihak yang tercicir dan tertinggal terutamanya mereka yang mempunyai keperluan khas.

Untuk makluman, KPM telah pun memohon peruntukan tambahan bagi Bantuan Pelajar Pendidikan Tinggi (BPPT), yang dahulunya dikenali sebagai Bantuan Baucar Buku yang disalurkan melalui Kad Diskaun Siswa Pelajar. KPM berharap, Kementerian Kewangan akan dapat meluluskan permohonan tambahan ini bagi membantu mahasiswa kita sekaligus meringankan beban mereka. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' HASBULLAH BIN OSMAN [GERIK]

TARIKH : 3.12.2019 (SELASA)

SOALAN NO. 2

DATO' HASBULLAH BIN OSMAN [GERIK] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah tindakan Kementerian mengenai saranan beberapa pihak untuk menghentikan penjualan alat ganti (*spare part*) motosikal YSUKU yang dikatakan menyalahi undang-undang Kementerian Pengangkutan. Mengapakah penunggang motosikal didenda sedangkan pengeluar dan pengedar terus dibiarkan meneruskan perniagaan untuk mengaut keuntungan.

JAWAPAN

Yang di-Pertua,

Kementerian Perdagangan Dalam Negeri dan Hal Ehwal Pengguna tiada menerima apa-apa saranan daripada pihak tertentu untuk menghentikan penjualan alat ganti (*spare part*) motosikal YSUKU. Pihak kementerian akan mengambil tindakan penguatkuasaan undang-undang sekiranya menerima aduan penjualan alat ganti (*spare part*) motosikal yang palsu atau tiruan di bawah Seksyen 8(2)(c) Akta Perihal Dagangan 2011 iaitu mendedahkan untuk pembekalan atau mempunyai dalam milikan, jagaan atau kawalannya apa-apa barang yang baginya suatu perihal dagangan palsu.

Penalti bagi kesalahan ini, pertubuhan perbadanan didenda tidak melebihi lima belas ribu ringgit (RM15,000) bagi setiap barangan yang diletakkan perihal dagangan palsu dan bagi kesalahan yang kedua atau berikutnya

didenda tidak melebihi tiga puluh ribu ringgit (RM30,000) bagi setiap perihal dagangan palsu, manakala bagi individu didenda tidak melebihi sepuluh ribu ringgit (RM10,000) bagi setiap barangan yang diletakkan perihal dagangan palsu atau dipenjarakan selama tempoh tidak melebihi tiga tahun atau kedua-duanya atau yang berikutnya didenda tidak melebihi dua puluh ribu ringgit (RM20,000) bagi setiap barangan yang diletakkan perihal dagangan palsu atau dipenjarakan selama tempoh tidak melebihi lima tahun atau kedua-duanya.

Secara dasarnya, sebarang pengubahsuaian terhadap spesifikasi/ reka bentuk kenderaan termasuk motorsikal yang berbeza dengan Kelulusan Jenis Kenderaan (VTA) oleh pihak JPJ adalah tidak dibenarkan. Ketetapan tersebut adalah selaras dengan peruntukan di bawah Seksyen 6, Akta Pengangkutan Jalan 1987: menyatakan mana-mana kenderaan yang telah diubahsuai sehingga tidak mematuhi ketetapan Kaedah Pengangkutan Jalan adalah tidak dibenarkan digunakan diatas jalan raya.

Berdasarkan kepada Seksyen 66 (1) (pp), Akta Pengangkutan Jalan 1987, setiap model baru kenderaan motor perlu menjalani prosedur Kelulusan Jenis Kenderaan (VTA) oleh pihak JPJ bagi memastikan pembinaan dan penggunaan kenderaan tersebut telah mematuhi ketetapan di bawah Akta dan Kaedahnya sebelum boleh didaftarkan dan dibenarkan digunakan di atas jalan raya.

Merujuk kepada ketetapan dasar sedia ada melibatkan motosikal, skop pengubahsuaian atau pemasangan aksesori pada motosikal yang dibenarkan oleh pihak JPJ adalah seperti berikut :-

- a) Pemasangan pengadang angin / *wind shield*; dan
- b) Pemasangan aksesori kosmetik tambahan pada motosikal selagi mana tidak mengubah identiti asal kenderaan.

Oleh yang demikian, pihak JPJ tidak mengalakkan atau membenarkan terhadap mana – mana pemilik kenderaan untuk mengubahsuai spesifikasi asal yang telah diluluskan di bawah prosedur Kelulusan Jenis Kenderaan (VTA) atas faktor-faktor seperti berikut:

NO SOALAN : 2

- a) akan mengakibatkan ciri-ciri keselamatan asal kenderaan terjejas dan boleh membahayakan keselamatan pengguna; dan
- b) akan menjejaskan kestabilan pemanduan dan kawalan serta ciri-ciri dinamik kenderaan.

Dalam usaha mengawalselia tahap kualiti dan pematuhan standard mandatori terhadap komponen automotif di Malaysia secara menyeluruh, pihak JPJ telah bekerjasama dengan pihak KPDNHEP dan Kastam untuk mengawalselia dalam aspek jualan dan pengimportan komponen tersebut. Sehubungan dengan itu, terdapat beberapa komponen automotif telah diwartakan di bawah Perintah Kastam (Larangan Mengenai Import) supaya hanya produk yang mematuhi standard mandatori sahaja dibenarkan diimport ke Malaysia iaitu melibatkan komponen berikut :-

- a) Topi Keledar Motosikal;
- b) *New Brake Lining & Brake Pad*;
- c) *New pneumatic Tyre & New Retread Pneumatic Tyre*;
- d) *Speed Monitoring Device / Speed Limiter Device*;
- e) *HID headlamp & Bulb (light source)*;
- f) *New seat*; dan
- g) *New Safety Seat Belt*.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG KAH WOH [IPOH TIMUR]

TARIKH : 3 DISEMBER 2019 (SELASA)

SOALAN

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan jumlah penerima yang mendapat manfaat daripada Program Rebat RM40 bil elektrik dan jumlah mereka yang layak tetapi masih belum berjaya mendaftarkan diri e-Kasih.

JAWAPAN

Tuan Yang di-Pertua,

Untuk makluman Ahli Yang Berhormat,

Sejumlah RM140 juta telah diperuntukkan oleh Kerajaan pada tahun 2019 untuk melaksanakan Program Rebat Bil Elektrik RM40 secara bersasar kepada Ketua Isi Rumah (KIR) dalam kategori miskin dan miskin tegar yang berdaftar dan disahkan dalam sistem eKasih, ICU JPM. Untuk tahun 2020, program ini masih diteruskan dengan peruntukan sebanyak RM104.14 juta.

Walaupun terdapat penurunan jumlah peruntukan pada tahun hadapan berbanding tahun ini, peruntukan RM104.14 juta tersebut dijangka akan mencukupi kerana berikutan pemutihan data KIR oleh pihak ICU JPM, terdapat 56,977 KIR (data sehingga 15 Oktober 2019) daripada kategori miskin tegar dan miskin telah pun terkeluar daripada Sistem eKasih.

Dengan jumlah peruntukan RM104.14 ini, Kementerian mensasarkan seramai 200,000 KIR layak menerima rebat bil elektrik RM40 pada tahun 2020 yang melibatkan peruntukan berjumlah RM96 juta.

Sehubungan ini juga, pihak Kementerian bercadang untuk mempergiatkan lagi pelan komunikasi dan hebahan mengenai Program Rebate Bil Elektrik RM40 kepada KIR-KIR yang layak supaya lebih ramai bilangan KIR dapat mengemas kini nombor akaun elektrik dengan syarikat-syarikat utiliti. Pelan komunikasi dan hebahan program ini akan dilaksanakan dengan menggunakan peruntukan sedia ada Program Subsidi Bil Elektrik yang telah diluluskan pada tahun hadapan.

Sehingga Oktober 2019, hanya 49.11% daripada 234,584 KIR yang layak telah mengemas kini nombor akaun elektrik dan menerima rebat bil elektrik ini.

Selain itu, sebagai langkah proaktif untuk meningkatkan bilangan KIR mengemaskini nombor akaun elektrik mereka, pihak Kementerian telah memohon kerjasama Unit Penyelarasan Pelaksanaan, Jabatan Perdana Menteri (ICU JPM) untuk menyertakan sekali maklumat nombor akaun elektrik semasa proses verifikasi KIR di bawah kategori miskin dan miskin tegar dilaksanakan di lapangan. Adalah diharapkan pihak ICU JPM dapat sama-sama membantu Kementerian dalam menjayakan program ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI DR. HAJI ISMAIL BIN
MOHAMED SAID [KUALA KRAU]**

TARIKH : 3 DISEMBER 2019

SOALAN

DATO' SRI DR. HAJI ISMAIL BIN MOHAMED SAID [KUALA KRAU] minta **MENTERI PERDAGANGAN ANTARABANGSA DAN INDUSTRI** menyatakan tentang langkah-langkah dan peranan yang perlu diambil pemain industri bagi mempersiapkan negara dalam mendepani Revolusi Perindustrian 4.0 (IR 4.0).

JAWAPAN

Tuan Yang di-Pertua,

1. Dasar Industry4WRD merupakan satu dasar negara untuk transformasi sektor pembuatan dan perkhidmatan berkaitan bagi tempoh 2018 hingga 2025. Dasar ini mengandungi tiga visi iaitu untuk menjadikan Malaysia sebagai:

- rakan strategik untuk pembuatan pintar dan perkhidmatan berkaitan di Asia Pasifik;
- destinasi utama untuk pelaburan industri berteknologi tinggi; dan
- penyedia penyelesaian menyeluruh (*total solutions provider*) untuk teknologi termaju.

NO SOALAN : 4

2. Dunia kini di ambang Revolusi Industri 4.0 dan bagi menjamin Malaysia tidak ketinggalan dan terus menjurus ke arah negara maju, penglibatan pemain industri adalah penting dalam mengadaptasi industri 4.0 dalam aktiviti perkilangan atau perkhidmatan mereka.

3. Sektor pembuatan yang kukuh akan memberi laluan kepada meningkatkan produktiviti, mewujudkan peluang pekerjaan, keupayaan inovasi, kumpulan tenaga kerja berkemahiran tinggi, kemakmuran ekonomi dan kesejahteraan masyarakat.

4. Kerajaan juga sedar bahawa syarikat pembuatan di Malaysia merupakan 90% di kalangan perusahaan kecil dan sederhana (PKS). Dalam merangka Dasar Kebangsaan mengenai Industri 4.0 yang dikenali sebagai Industry4WRD, kerajaan telah memperkenalkan program Penilaian Kesediaan (*Readiness Assessment*). Program ini akan membantu PKS untuk mengukur jurang dan kesediaan mereka dari segi sumber tenaga, proses dan teknologi. Laporan dari program Penilaian Kesediaan ini dapat membantu PKS untuk merangka halatuju dan penyesuaian mereka dengan teknologi Industri 4.0.

Tuan Yang di-Pertua,

5. Penggunaan teknologi Industri 4.0 dapat mengatasi masalah kebergantungan terhadap sumber tenaga yang kurang berkemahiran secara signifikan dan mengubah masa depan dunia pekerjaan. Oleh itu, syarikat perlu menyediakan latihan melalui program peningkatan kemahiran dan melatih semula ("*upskilling & reskilling*") agar tenaga kerja sediaada kekal relevan serta terus memberi sumbangan kepada ekonomi negara. Oleh itu, sistem pendidikan di Malaysia memainkan peranan yang penting bagi menyediakan tenaga kerja berkemahiran tinggi, kreatif dan inovatif bagi memenuhi permintaan industri.

6. Syarikat juga boleh menaiktaraf kilang-kilang sediaada menjadi kilang yang lebih pintar menerusi aplikasi alat yang digunakan bagi inisiatif

NO SOALAN : 4

Industri 4.0 seperti pendigitalan dan *Internet of Things* (IOT). Kilang-kilang pintar akan meningkatkan produktiviti melalui penambahbaik pengurusan tenaga, menganalisa prediktif penyelenggaraan, melaksanakan semakan inventori, meminimakan masa ketergendalaan dan melaksanakan *integrated remote operation*. Kilang-kilang pintar akan menjadi lebih responsif terhadap permintaan pengguna dan beroperasi dalam keadaan yang lebih kos berkesan dengan memanfaatkan pemusatan teknologi seperti *big data analytic*, *cloud solutions*, *embedded system*, mobiliti dan kesalinghubungan rangkaian.

Tuan Yang di-Pertua,

7. Kerajaan amat prihatin dan telah menyediakan beberapa insentif dalam membantu PKS. Syarikat perlu bijak memanfaatkan insentif-insentif yang diperkenalkan oleh kerajaan bagi mempersiapkan syarikat dalam mendepani Revolusi Perindustrian 4.0 supaya kekal kompetitif di peringkat global. Di antara insentif khusus yang diperkenalkan adalah :

- I. Peruntukkan sebanyak RM210 juta bagi tahun 2019 hingga 2021 untuk menggalakkan peralihan kepada Industri 4.0. Perbadanan Produktiviti Malaysia akan menjalankan program penilaian kesedian (*Readiness Assessment*) untuk membantu 500 buah syarikat Perusahaan Kecil dan Sederhana (PKS) beralih kepada teknologi Industri 4.0;
- II. Peruntukkan sebanyak RM2 bilion akan disediakan di bawah Skim Jaminan Pembiayaan Perniagaan (SJPP) di mana Kerajaan akan memberikan jaminan pembiayaan sehingga 70% bagi menggalakkan PKS membuat pelaburan dalam automasi dan pemodenan yang merupakan komponen Industri 4.0;
- III. Menyediakan Dana Transformasi Pendigitalan Industri (*Industry Digitalisation Transformation Fund*) dengan saiz dana RM3 bilion dengan insentif subsidi kadar faedah 2% melalui Bank

NO SOALAN : 4

Pembangunan Malaysia Berhad. Dana ini bertujuan merancakkan industri untuk menerap teknologi pintar merangkumi robotik dan kecerdasan buatan (*Artificial Intelligence*);

- IV. MIDA melalui Dana Impak Tinggi (High Impact Fund) akan terus menyediakan geran padanan untuk menggalakkan inisiatif Industri 4.0. Ini akan merangkumi aktiviti seperti R&D, penerimaan sijil dan piawaian antarabangsa, serta pemodenan fasiliti dan peralatan dengan teknologi yang terkini; dan
- V. Galakan cukai pendapatan (potongan cukai dua kali) bagi pembangunan modal insan.

8. MITI bersama-sama dengan pihak agensi dan juga persatuan syarikat pembuatan akan terus berganding bahu meneruskan usaha mempromosi program RA dan meningkatkan kesedaran tentang kepentingan beralih ke Industri 4.0 ke seluruh Malaysia.

Tuan Yang di-Pertua,

9. Perjanjian dana antara MITI dan MIDA telah ditandatangani pada 20 November 2019 (status terkini : Penurunan Kuasa dari Pejabat YBM belum selesai). Permohonan adalah terbuka kepada syarikat yang telah menerima laporan RA. Setakat ini, sebanyak 26 laporan RA telah diluluskan dan hantar kepada syarikat untuk permohonan dana melalui MIDA.

10. Sebanyak 135 RA telah dilaksanakan di premis syarikat. Setakat 29 November 2019, sebanyak 810 permohonan telah diterima dan disahkan. Manakala 472 PKS telah disaring dan didapati 421 PKS yang layak dan telah diluluskan oleh Jawatankuasa Teknikal. Sebanyak 51 syarikat akan diangkat untuk kelulusan Jawatankuasa Teknikal yang seterusnya.

NO SOALAN : 4

11. MIDA melalui Dana Impak Tinggi (*High Impact Fund*) dan Dana Strategik Pelaburan Tempatan (DISF) akan terus menyediakan geran padanan untuk menggalakkan inisiatif Industri 4.0. Ini akan merangkumi aktiviti seperti R&D, penerimaan sijil dan piawaian antarabangsa, serta pemodenan fasiliti dan peralatan dengan teknologi yang terkini.

12. Penilaian kriteria RA adalah sama untuk MNC dan PKS. RA yang dibiayai oleh kerajaan adalah terbuka kepada semua PKS seperti syarat-syarat berikut:

- Sektor Perkilangan – perolehan jualan antara RM 300,000 dan tidak melebihi RM 50 Juta dan/atau pekerja dari 5 orang dan tidak melebihi daripada 200 orang.
- Sektor perkhidmatan yang berkaitan dengan pembuatan (dengan izin Manufacturing related services) – Perolehan jualan dari RM 300,000 dan tidak melebihi RM 20 juta dan/atau pekerja dari 5 orang dan tidak melebihi daripada 75 orang.
- Potongan cukai boleh dinikmati oleh semua syarikat termasuk MNC dan PKS mahupun syarikat yang menyertai RA dengan perbelanjaan sendiri tanpa dibiayai oleh kerajaan.

13. Dengan sokongan dan bantuan daripada semua pihak, aspirasi Kerajaan untuk membangunkan industri ke arah Industri 4.0 akan menjadi kenyataan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 3 DISEMBER 2019 (SELASA)

SOALAN NO. 5

Minta **MENTERI PERTANIAN DAN INDUSTRI ASAS TANI** menyatakan adakah kejadian jerebu akan menjejaskan pengeluaran sarang burung layang-layang di negara

JAWAPAN

Yang di-Pertua,

1. Untuk makluman Ahli Yang Berhormat, burung layang-layang dan burung walit adalah merupakan dua (2) jenis burung yang berbeza. Perbezaan kedua-dua jenis burung tersebut adalah seperti berikut: -

- i. burung layang-layang menghasilkan komponen sarang burung dari rumput, ranting dan bulu; dan sarangnya tidak boleh dimakan oleh manusia; dan
- ii. burung walit pula menghasilkan komponen sarang burung dari rembesan air liurnya; dan sarangnya boleh dimakan oleh manusia;

2. Industri sarang burung walit merupakan salah satu industri bernilai tinggi yang diberikan tumpuan oleh Kementerian Pertanian dan Industri Asas Tani. Dalam konteks ini, kejadian jerebu yang menyebabkan pencemaran udara sememangnya memberi kesan negatif kepada industri. Antara kesannya adalah:

SOALAN NO : 5

- i. burung walit kekurangan sumber bekalan makanan apabila serangga yang menjadi makanannya berkurangan;
 - ii. sumber makanan yang kurang menyebabkan burung walit kurang menghasilkan air liur bagi penghasilan sarang; dan
 - iii. jumlah pengeluaran dan kualiti sarang yang dihasilkan akan terjejas.
3. Dalam pada itu, sekiranya berlaku kejadian jerebu yang serius, ia dijangka akan memberi kesan yang panjang kepada industri kerana burung walit secara semulajadinya akan berhijrah (*migrate*) ke kawasan yang kurang pencemaran.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATO' SRI ROHANI BT. ABDUL KARIM
(BATANG LUPAR)**

TARIKH : 3 DISEMBER 2019

SOALAN

DATO' SRI HAJAH ROHANI BINTI HAJI ABDUL KARIM [BATANG LUPAR] minta **MENTERI DALAM NEGERI** menyatakan kaedah yang berkesan dan efektif untuk mengatasi masalah ramai kanak-kanak yang memohon kewarganegaraan khususnya di Parlimen Batang Lupar. Adakah akan diwujudkan Jawatankuasa Khas untuk meneliti dan menangani masalah ini.

JAWAPAN

Tan Sri Yang Di Pertua,

Kementerian Dalam Negeri sentiasa prihatin dengan isu dokumentasi dan pengenalan diri dalam kalangan penduduk negara ini. Antara langkah yang sedang diambil dalam menangani isu permohonan kewarganegaraan selaras dengan peruntukan di bawah Bahagian III Perlembagaan Persekutuan, Citizenship Rules 1964 serta perundangan berkaitan yang berkuat kuasa dalam isu pendaftaran perkahwinan, kesahtarafan anak, peraturan Imigresen dan lain-lain adalah seperti berikut:-

- (i) Penguatkuasaan undang-undang berkaitan dengan penentuan kewarganegaraan yang mana kewarganegaraan individu ditentukan berdasarkan status perkahwinan dan taraf kewarganegaraan ibu bapa sewaktu kelahiran; dan

SOALAN NO : 6

- (ii) pertimbangan terhadap permohonan kewarganegaraan bagi individu berkeelayakan sama ada melalui pendaftaran ataupun naturalisasian selaras dengan usaha Kementerian Dalam Negeri ke atas penambahbaikan komprehensif terhadap prosedur pengendalian standard ataupun SOP permohonan kewarganegaraan.

Kementerian Dalam Negeri telah memuktamadkan pengemaskinian prosedur pengendalian standard ataupun SOP permohonan kewarganegaraan di bawah Perkara 15A Perlembagaan Persekutuan bagi individu berumur bawah 21 tahun. SOP berkenaan yang akan dilaksanakan bermula tahun hadapan mengandungi mekanisme pemakluman kepada pemohon berkaitan sebab-sebab sesuatu permohonan kewarganegaraan itu ditolak serta tempoh pemprosesan permohonan kewarganegaraan.

Tempoh pemprosesan permohonan kewarganegaraan yang lengkap diterima bermula pada tahun hadapan adalah seperti mana berikut. Pertama, di Jabatan Pendaftaran Negara (JPN) 3 bulan 14 hari dan di Kementerian Dalam Negeri 8 bulan. Manakala bagi permohonan kewarganegaraan lain di bawah Perlembagaan Persekutuan, fakta dan dokumen sokongan yang dikemukakan oleh setiap pemohon akan diteliti secara case by case mengikut giliran yang sewajarnya sebelum keputusan dikeluarkan.

Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes, termasuklah tempoh mendapatkan laporan tapis keselamatan yang dijalankan oleh Polis Diraja Malaysia. Untuk maklumat Ahli Yang Berhormat, penambahbaikan SOP berkenaan adalah berdasarkan kepada pematuhan syarat di bawah Bahagian III Perlembagaan Persekutuan dan Citizenship Rules 1964 serta turut mengambil kira pelbagai aspek termasuklah kebajikan pemohon tanpa mengabaikan keselamatan dan kesejahteraan warganegara sedia ada.

Berhubung dengan pewujudan Jawatankuasa Khas sepertimana yang dibangkitkan oleh Ahli Yang Berhormat, buat masa ini tiada keperluan untuk mewujudkan Jawatankuasa berasingan bagi menyelesaikan isu

SOALAN NO : 6

permohonan kewarganegaraan kerana permohonan kewarganegaraan yang diterima adalah di bawah bidang kuasa pertimbangan Kerajaan Persekutuan seperti yang ditetapkan dalam Perlembagaan Persekutuan.

Untuk maklumat tambahan juga, untuk makluman Ahli Yang Berhormat, di Parlimen Batang Lupa ini, terdapat enam pejabat JPN yang terletak dalam kawasan Parlimen Batang Lupa iaitu JPN Sri Aman, JPN Lingga, JPN Betong, JPN Pusat, JPN Sebuyau dan JPN Maludam. Mengikut statistik yang ada, terdapat 10 kes permohonan di bawah Perkara 15A iaitu daftar lewat kelahiran yang telah dikemukakan ke Pejabat Pendaftaran di kawasan Parlimen Batang Lupa. Terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHANG LIH KANG (TANJONG MALIM)

TARIKH : 3 DISEMBER 2019 (SELASA)

SOALAN

Minta **MENTERI PERTAHANAN** menyatakan penyelenggaraan tanah milik KEMENTAH Tapak MDSTP di Sungkai, Perak tentang jumlah pembayaran cukai tanah tahunan dari 2010 hingga 2019, serta pendapatan yang dijana oleh Tapak MDSTP (dari 2010 hingga 2019) yang kini disewakan bagi tujuan pertanian.

JAWAPAN

Tuan Yang di-Pertua,

Kementerian Pertahanan telah mengeluarkan kelulusan bagi sewaan Tanah Persekutuan kegunaan Kementerian Pertahanan di Lot 5847, PT 4815 dan PT 4816 Mukim Sungkai Daerah Batang Padang, Perak dengan keluasan keseluruhan tanah adalah 1,222.772 ekar. Daripada jumlah keluasan tanah berkenaan, sebahagian tanah seluas 309.678 ekar telah disewa kepada beberapa syarikat untuk mengusahakan aktiviti pertanian seperti tanaman kontan, mengutip hasil sawit, tanaman jambu batu dan pelbagai lagi hasil tanaman.

Tujuan sewaan tanah tersebut adalah bagi memastikan kerajaan mendapat hasil daripada aktiviti sewaan tanah di samping mengelakkan berlaku pencerobohan oleh pihak yang tidak bertanggungjawab.

Bagi tapak yang dicadangkan untuk *Projek Malaysian Defence And Security Technology Park* (MDSTP) ini, Kerajaan dianggarkan telah menerima hasil bayaran sebanyak RM 419,940 melalui hasil sewaan tanah sejak tahun 2010 hingga tahun 2019.

Urusan penyewaan tanah seperti pengeluaran Surat Setuju Terima dan Perjanjian Penyewaan diuruskan oleh Jabatan Ketua Pengarah Tanah dan Galian (JKPTG) di bawah Kementerian Air, Tanah dan Sumber Asli (KATS). Cukai tanah tahunan juga dibayar dan diurus oleh pihak JKPTG selaku tuan tanah dengan nilai bayaran cukai tanah setahun adalah sebanyak RM 1.48 juta (berdasarkan tanah Persekutuan kegunaan Kementerian Pertahanan seluas 1,222.772 ekar).

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. SHAMSUL ANUAR BIN HAJI
NASARAH [LENGGONG]**

TARIKH : 3.12.2019 (RABU)

minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah mekanisme yang akan dilaksanakan bagi mengatasi masalah manipulasi produk berasaskan muslim oleh usahawan bukan muslim yang menggunakan agama Islam dan tulisan jawi untuk mengaburi mata pengguna muslim yang merupakan pengguna terbesar di negara bagi mengaut keuntungan.

JAWAPAN

Tuan Yang di-Pertua,

1. Kementerian ini sentiasa memberi perhatian serius berhubung isu-isu manipulasi perbahasaan halal seperti ungkapan '*Muslim friendly*', '*shariah compliance*', penggunaan ayat Al-Quran dan lain-lain ungkapan dan perbuatan, yang mana ianya menjadi suatu kesalahan di bawah Perintah Perihal Dagangan (Takrif Halal) 2011 dan Perintah Perihal Dagangan (Perakuan dan Penandaan Halal) 2011.
2. Walau bagaimanapun, asas kepada tindakan pemeriksaan yang dilaksanakan adalah bagi memastikan produk makanan atau premis makanan yang menggunakan perbahasaan halal adalah disahkan halal oleh badan berkuasa berwibawa iaitu JAKIM dan Majlis Agama Islam Negeri, bukanlah bagi memastikan ianya dimiliki oleh orang Islam semata-mata.

3. Bagi menangani isu-isu manipulasi perbahasaan halal seperti ini, Kementerian akan mengambil tindakan-tindakan seperti berikut:

- a) Berkerjasama dengan JAKIM dan Jabatan Agama Islam Negeri bagi memperkemaskan penguatkuasaan berkaitan perbahasaan halal;
- b) Membuat hebahan umum mengenai pematuhan perundangan halal melalui media sosial rasmi Kementerian dan menerbitkan kenyataan media;
- c) Menjalankan pemeriksaan halal secara berkala di rumah-rumah penyembelihan, kilang pemprosesan, pasaraya dan restoran di samping memberi khidmat nasihat mengenai perundangan; dan
- d) Mengadakan operasi khas berkaitan halal secara bersepadu dengan agensi-agensi Kerajaan di seluruh negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE DUA,
PARLIMEN EMPATBELAS**

PERTANYAAN : JAWAB LISAN

**DARIPADA : YB PUAN KASTHURIRAANI A/P PATTO
(BATU KAWAN)**

TARIKH : 3 DISEMBER 2019

SOALAN

PUAN KASTHURIRAANI A/P PATTO [BATU KAWAN] minta **MENTERI DALAM NEGERI** menyatakan apakah bilangan terkini banduan hukuman gantung mengikut seksyen kesalahan dan pecahan etnik, kewarganegaraan, umur dan status sosial (golongan B40 atau golongan lain), status pemansuhan hukuman gantung serta adakah ianya retrospektif terhadap semua kes banduan akhir, dan bagaimana pula dengan yang sedang menjalani hukuman gantung tersebut.

JAWAPAN

Tan Sri Yang Di Pertua,

Untuk makluman Ahli Yang Berhormat, berdasarkan rekod Jabatan Penjara Malaysia sehingga 2 Disember 2019, terdapat seramai 1,280 orang banduan yang telah disabitkan bersalah oleh mahkamah dan dijatuhkan hukuman mati.

Walau bagaimanapun, hukuman mati tersebut belum dapat dilaksanakan kerana 453 orang banduan masih lagi dalam proses rayuan di peringkat Mahkamah Rayuan dan Mahkamah Persekutuan. Manakala, 827 orang dalam proses rayuan di peringkat Lembaga Pengampunan Negeri serta waran pelaksanaan hukuman mati terhadap mereka masih belum diterima.

SOALAN NO : 9

Daripada jumlah banduan akhir tersebut, statistik menunjukkan seramai 350 orang melakukan kesalahan di bawah seksyen 302 Kanun Keseksaan iaitu membunuh, 899 orang di bawah seksyen 39B Akta Dadah Berbahaya iaitu pengedaran dadah. Lapan orang di bawah seksyen 121 Kanun Keseksaan berperang dengan Yang di-Pertuan Agong. Seramai 15 orang di bawah seksyen 3 dan 7 Akta Senjata Api melepaskan tembakan di bawah kesalahan berjadual dan berdagang senjata api.

Selain itu, statistik tersebut turut menunjukkan terdapat lima orang dan dua orang masing-masing disabitkan di bawah seksyen 3 Akta Culik dan seksyen 396 Kanun Keseksaan iaitu rompakan berkumpulan dan pembunuhan. Manakala seorang banduan telah disabitkan di bawah seksyen 57(1)(a) Akta Keselamatan Dalam Negeri iaitu kesalahan melibatkan senjata api dan bahan letupan.

Bagi pecahan mengikut kewarganegaraan pula Tuan Yang di-Pertua, rekod Jabatan Penjara Malaysia menunjukkan terdapat 734 warganegara Malaysia dan 546 orang adalah warganegara asing yang berasal daripada 43 buah negara. Daripada jumlah banduan akhir warganegara Malaysia, rekod Jabatan Penjara Malaysia menunjukkan terdapat seramai 349 orang banduan Melayu, 193 orang banduan India dan 150 orang banduan Cina. Manakala seramai 34 orang banduan terdiri daripada lain-lain etnik.

Seramai 397 orang terdiri daripada mereka berumur 21 tahun ke 30 tahun. Seramai 525 orang berada di dalam kategori umur di bawah 31 tahun ke 40 tahun. Manakala 267 orang pula adalah berumur di antara 41 tahun ke 50 tahun. Bagi banduan hukuman mati yang berumur di antara 51 tahun ke 60 tahun, terdapat seramai 74 orang dan 17 orang berumur 60 tahun ke atas.

Berdasarkan kepada sosioekonomi B40 pula, seramai 240 orang tidak bekerja, 140 orang adalah ahli perniagaan, 143 orang guru dan 90 orang bekerja sendiri. Mereka ini mewakili 47.9 peratus keseluruhan jumlah banduan akhir. Untuk makluman Ahli Yang Berhormat juga, menurut Bahagian Hal Ehwal Undangundang Jabatan Perdana Menteri pada 12 Julai 2019, kerajaan telah bersetuju dengan pindaan terhadap undang-undang

SOALAN NO : 9

bagi menggantikan hukuman mati mandatori hendaklah dibuat dengan berhati-hati terutamanya mengenai peruntukan tambahan bagi memberikan kuasa budi bicara kepada hakim untuk menjatuhkan hukuman.

Sehubungan dengan itu, jawatankuasa khas bagi mengkaji keseluruhan polisi penghukuman ataupun sentencing policy dengan izin, khususnya berkaitan dengan cadangan menggantikan hukuman mati mandatori dengan hukuman yang tertakluk kepada budi bicara mahkamah serta hukuman penjara seumur hidup yang melibatkan semua akta berkaitan telah ditubuhkan. Jawatankuasa khas ini telah mengadakan mesyuarat pertama pada 20 September 2019 bagi memulakan kajian yang akan berlangsung selama tiga bulan.

Kerajaan juga pada masa yang sama telah memutuskan agar moratorium terhadap pelaksanaan hukuman mati diteruskan sehingga kajian jawatankuasa tersebut selesai dan mencapai keputusan muktamad. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI REEZAL MERICAN BIN NAINA
MERICAN [KEPALA BATAS]**

TARIKH : 3 DISEMBER 2019 (SELASA)

SOALAN NO. 10

Minta **MENTERI PENDIDIKAN** menyatakan apakah perancangan Kementerian untuk memasukkan silibus pendidikan demokrasi di sekolah memandangkan Parlimen telah sebulat suara menyokong pindaan Perlembagaan yang membolehkan rakyat berumur 18 tahun mengundi. Jika ada, apakah jaminan Kerajaan bahawa silibus tersebut tidak hanya cenderung mempromosikan parti Kerajaan sahaja.

JAWAPAN

Tuan Yang di-Pertua,

Tajuk Demokrasi dan Perlembagaan telah dimasukkan dalam kurikulum Sejarah, Pendidikan Islam, Pendidikan Moral, Pendidikan Sivik, Bahasa Melayu dan Bahasa Inggeris yang sedang dilaksanakan di sekolah-sekolah pada masa kini. Tajuk ini diajar kepada murid mengikut aras dan tahap kebolehan serta keupayaan murid. Tajuk ini tidak mempromosikan mana-mana parti, sebaliknya tajuk ini memberi penekanan kepada fakta sejarah dan usaha-usaha ke arah kemerdekaan Persekutuan Tanah Melayu daripada penjajah yang dilaksanakan oleh semua parti politik pada waktu itu tanpa bias kepada mana-mana pihak ataupun mana-mana individu tertentu.

Selain daripada penerapan melalui mata pelajaran, pendidikan demokrasi juga diajar dalam Program Pendidikan Sivik yang diperkenalkan semula pada Jun 2019, pendedahan kepada murid turut dilaksanakan di awal usia sebagai usaha meningkatkan literasi politik pengundi muda dengan membincangkan beberapa tajuk seperti Sistem

NO. SOALAN: 10

Demokrasi Berparlimen, Pemupukan Jati Diri, Sistem Raja Berperlembagaan, Rukun Negara, Semangat Patriotik dan Cintai Malaysia, dan pendekatan ini bukan hanya diajarkan dalam bilik darjah semata-mata, pendidikan demokrasi tidak hanya terkurung *within the four walls of the classroom*, tetapi juga dimasukkan juga dalam aktiviti kokurikulum dan *extra* kurikulum dan juga pelbagai aktiviti lain untuk menyemarakkan semangat dan ruh warganegara ataupun rakyat yang bertanggungjawab dan juga mempunyai kecintaan terhadap tanah air.

Berkaitan dengan kesesuaian kurikulum dengan pindaan umur mengundi 18 tahun yang telah diluluskan dalam Parlimen, Kementerian Pendidikan Malaysia (KPM) telah dan sedang mengambil langkah bagi meningkatkan kesedaran murid sebagai persediaan mereka untuk menjadi pengundi apabila berumur 18 tahun melalui kurikulum dan aktiviti kokurikulum. Selain itu, murid juga akan terlibat dengan pemilihan ketua murid melalui model ala pilihanraya. KPM dengan kerjasama Akademi Pilihanraya telah menyediakan modul berkaitan pilihanraya sebagai bahan sokongan dalam pembelajaran murid. Selain itu, Suruhanjaya Pilihanraya (SPR) terlibat dalam menjalankan sesi sindikasi dan simulasi pemilihan ketua murid melalui mekanisme pilihanraya di sekolah melalui sekolah-sekolah yang terpilih dan bertahap-tahap.

Dapatan sindikasi tersebut akan dijadikan asas sebagai penyediaan garis panduan pelaksanaan proses pemilihan ketua murid menggunakan sistem pilihanraya di sekolah. Surat Pekeliling Ikhtisas (SPI) yang baharu akan memberikan kebenaran kepada pihak sekolah memperluas penggunaan "*speaker's corner*" yang telah kita perkenalkan semenjak Jun tahun lalu sebagai platform calon pengawas murid mempromosi keupayaan diri dan membenarkan proses pemilihan ala pilihanraya di sekolah. SPI baharu ini akan membatalkan SPI Bil. 5 Tahun 2010 yang melarang pilihanraya diadakan di sekolah bagi tujuan pemilihan ketua murid kerana masalah yang timbul pada waktu tersebut dan sedikit pembelajaran yang telah kita akan sediakan SPI yang baharu yang lebih komprehensif dan lebih mematangkan anak-anak. Semua program yang sedang dan akan dijalankan oleh KPM diharapkan dapat melahirkan murid yang memahami erti demokrasi dan melahirkan warga Malaysia yang cintakan nusa, bertanggungjawab, berkeamanan dan juga memberikan sumbangan kepada negara. Sekian, terima kasih.

**PEMBERITAHUAN PERTANYAAN DEWAN NEGARA
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN TEH KOK LIM [TAIPING]

TARIKH : 3 DISEMBER 2019 (SELASA)

SOALAN

Minta **MENTERI PERTANIAN DAN INDUSTRI ASAS TANI** menyatakan tahap pembekalan makanan tempatan dan usaha-usaha yang telah diambil untuk meningkatkan lagi pembekalan tempatan makanan utama.

JAWAPAN

Tuan Yang di-Pertua,

1. Untuk makluman Ahli Yang Berhormat, perbandingan peratusan jumlah penghasilan makanan asasi berbanding dengan peratusan makanan yang diimport boleh diketahui menerusi formula Kadar Pergantungan Import (IDR). Ianya merupakan satu indikator yang menunjukkan sejauh mana pergantungan sesebuah negara terhadap import komoditi pertanian untuk memenuhi keperluan domestik. Nilai IDR yang lebih tinggi menunjukkan bahawa lebih banyak bekalan komoditi pertanian yang akan diimport bagi memenuhi permintaan domestik. Perbandingan kadar IDR berbanding dengan Tahap Sara Diri (SSL) adalah seperti berikut:

Komoditi agromakanan	IDR (%)	SSL (%)
Beras (IPB)	30.5	70.0
Sayur-sayuran	71.8	46.6
Buah-buahan	35.7	77.5
Daging Lembu/Kerbau	80.1	22.2

Daging Kambing/Biri-biri	89.8	10.2
Daging Babi (40% penduduk)	8.7	92.1
Daging Ayam/Itik	4.3	103.7
Telur Ayam/Itik (biji)	0.03	114.7
Tenusu (Liter)	147.1	3.5
Susu Segar (Liter)	46.2	58.3
Ikan Makanan	14.0	92.8

2. Antara usaha-usaha yang telah dan sedang dilaksanakan oleh Kementerian Pertanian dan Industri Asas Tani (MOA) bagi memastikan penawaran bahan mentah keluaran tempatan mencukupi untuk menampung keperluan rakyat Malaysia adalah seperti berikut:

- i. Melaksanakan pembangunan empat Kawasan Pembangunan Pertanian Bersepadu (IADA) iaitu Pekan dan Rompin di Pahang, Batang Lupa di Sarawak dan Kota Belud di Sabah sebagai jelang padi negara yang baharu. Dengan pembukaan empat kawasan baharu ini beserta inisiatif-inisiatif lain seperti penggunaan varieti padi sah baharu yang berhasil tinggi dan rintang penyakit, hasil pengeluaran padi negara dijangka akan meningkat sehingga ke Tahap Sara Diri (SSL) sebanyak 75 peratus pada tahun 2020 dan seterusnya mengurangkan kebergantungan kepada import beras;
- ii. Meningkatkan pengeluaran dalam sektor perikanan menerusi pengukuhan pengurusan perikanan tangkapan, mentransformasi infrastruktur dan prasarana pendaratan ikan, menguatkuasakan Pemantauan, Kawalan dan Pengawasan (MCS) dan memperkasa industri akuakultur;
- iii. Meningkatkan pengeluaran sayur-sayuran menerusi pelbagai inisiatif penanaman seperti peluasan tanaman dalam Taman Kekal Pengeluaran Makanan (TKPM), penggunaan teknologi pertanian moden dan sebagainya;

- iv. Meningkatkan populasi ternakan ruminan melalui pelaksanaan Projek Ladang Satelit dan Taman Kekal Pengeluaran Ruminan. Kerajaan juga sedang melaksanakan sebanyak lima Lembah Tenusu dengan mensasarkan tambahan susu segar sebanyak 20 juta liter dalam tempoh lima tahun; dan
- v. Melaksanakan pelbagai projek agromakanan yang mempunyai potensi pertumbuhan tinggi seperti akuakultur, rumpai laut dan sarang burung walit, mempergiatkan Program Agropreneur Muda dan membangunkan industri jagung bijian bagi menangani kebergantungan import bahan makanan untuk ternakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJI FADILLAH BIN YUSOF
[PETRAJAYA]**

TARIKH : 3 DISEMBER 2019 (SELASA)

SOALAN NO. 12

Minta **MENTERI PENDIDIKAN** menyatakan status pembukaan universiti Jepun seperti yang diumumkan oleh YAB Perdana Menteri dahulu. Sudahkah dimuktamadkan.

JAWAPAN

Tuan Yang di-Pertua,

Untuk makluman Ahli Yang Berhormat, YAB Perdana Menteri Malaysia berhasrat untuk memberi lebih pendedahan dan akses kepada sistem pendidikan Jepun bagi pelajar Malaysia melalui polisi Pandang ke Timur. Sehubungan itu YAB Perdana Menteri telah mencadangkan kepada Perdana Menteri Jepun untuk menubuhkan kampus cawangan institusi pendidikan tinggi (IPT) Jepun di Malaysia. Hasrat YAB Perdana Menteri ini telah disambut baik oleh Kerajaan Jepun

Selaras dengan itu, satu lawatan kerja oleh Kerajaan Jepun ke Malaysia telah diadakan pada bulan September 2019 yang terdiri daripada Ministry of Education, Culture, Sports, Science and Technology of Japan (MEXT), Ministry of Foreign Affair dan Japan Embassy in Malaysia. Antara perkara utama yang dibincangkan bersama-sama delegasi Jepun adalah mengenai penubuhan, pendaftaran dan pengoperasian sebuah institusi pendidikan tinggi swasta (IPTS). Terdapat dua (2) buah IPT Jepun telah mempertimbangkan penubuhan kampus cawangan di Malaysia iaitu Nippon Designers School yang merupakan IPTS di Jepun dan University of Tsukuba yang merupakan Universiti Awam di Jepun.

Setelah mendapat persetujuan pengecualian moratorium penubuhan IPTS daripada Jemaah Menteri, pelbagai usaha memudahcara telah dilaksanakan seperti kerja ke cadangan lokasi, perbincangan dengan kampus cawangan luar negara yang telah beroperasi di Malaysia bagi berkongsi pengalaman, perbincangan dengan agensi pemberi biasiswa dan bantuan pinjaman pendidikan, serta perbincangan dengan Institusi Pendidikan Tinggi yang lain mengenai potensi kolaborasi.

Berdasarkan perbincangan awal, penubuhan kampus cawangan University of Tsukuba di Malaysia adalah dijangka pada tahun 2021 manakala penubuhan kampus cawangan Nippon Designers School adalah dijangka pada tahun 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB. DATO' SRI IKMAL HISHAM BIN
ABDUL AZIZ [TANAH MERAH]**

TARIKH : 3 DISEMBER 2019

SOALAN

YB DATO' SRI IKMAL HISHAM BIN ABDUL AZIZ minta **MENTERI PERDAGANGAN ANTARABANGSA DAN INDUSTRI** menyatakan berapa ramai baki pengedar Melayu Bumiputera dalam Proton di Lembah Klang dan seluruh negara yang tinggal sejak Syarikat Geely mengambil-alih Proton serta apakah langkah-langkah Kerajaan bagi membantu Bumiputera agar dapat bertahan dalam industri automotif nasional.

JAWAPAN

Tuan Yang Di Pertua,

1. Pada tahun 2017, perjanjian kerjasama strategik PROTON-Geely telah dimeterai dalam usaha memulihkan prestasi syarikat kenderaan nasional tersebut secara menyeluruh dan melaksanakan transformasi bagi mencapai pertumbuhan prestasi yang lebih mampan.
2. Dalam usaha membangunkan rangkaian pengedar yang mesra pelanggan, PROTON telah melaksanakan program penaiktarafan pengedar daripada kategori 1S (sales) dan 2S (*sales and spare parts*), kepada 3S (*sales, service and spare part*) atau 4S (*sales, service, spare part and body shop*).

SOALAN NO 13

3. Penaiktarafan ini tidak diwajibkan kepada semua pengedar-pengedar, namun demikian PROTON menggalakkan para pengedar untuk menaik taraf pusat-pusat perkhidmatan mereka bagi tujuan meningkatkan tahap kepuasan pemilik-pemilik kenderaan Proton melalui perkhidmatan bersepadu di pusat-pusat perkhidmatan 3S/4S. Penaiktarafan ini dijangka akan meningkatkan pendapatan para pengedar memandangkan model perkhidmatan yang ditawarkan ini pada kebiasaannya menjadi pilihan utama pemilik-pemilik kenderaan PROTON.

4. Berdasarkan maklumat yang dikemukakan oleh PROTON, jumlah rangkaian pengedar di seluruh negara pada masa kini adalah sebanyak 297 pengedar iaitu pengurangan 47 pengedar berbanding 344 pengedar sebelum permerteraian kerjasama strategik PROTON-Geely pada 2017. Pecahan bilangan rangkaian pengedar adalah seperti berikut:

	2017	September 2019	Perbezaan
Pengedar Bumiputera	145	98	(47)
Pengedar Bukan Bumiputera	199	199	-
Jumlah	344	297	(47)

5. Mengikut penjelasan PROTON, pengurangan bilangan pengedar Bumiputera adalah secara sukarela oleh syarikat pengedar di atas pertimbangan keputusan perniagaan mereka. Terdapat faktor-faktor lain selain daripada penaiktarafan dari pusat 3S ke 4S yang berkemungkinan menyebabkan pengurangan bilangan pengedar Bumiputera Proton termasuklah faktor jualan kereta keluaran Proton yang agak lembap pada tahun 2017 dan 2018.

6. Pada tahun 2017 dan 2018, PROTON menduduki tempat ke tiga dari segi jualan (*Total Industry Volume*) di bawah Perodua dan Honda. Selepas pensegaran semula Proton, setakat September 2019, PROTON kini menduduki tangga kedua dengan jualan sebanyak 69,920 unit. Selain daripada jualan model X70 yang membantu dalam peningkatan

jualan PROTON pada tahun 2019, jualan bagi model Saga dan Persona baharu juga amat menggalakkan pada masa ini.

7. Untuk makluman, PROTON telah menerima sebanyak 277 permohonan daripada pengedar sedia ada untuk menaik taraf ke 3S/4S. Permohonan pengedar Bumiputera adalah menggalakkan iaitu pada kadar 73.5% atau bersamaan dengan 72 permohonan daripada 98 pengedar Bumiputera sedia ada. Dalam hal ini, PROTON mengalukan penglibatan syarikat Bumiputera, samada di kalangan rangkaian pengedar sedia ada atau pelabur baharu, untuk memohon pembukaan pusat-pusat 3S/4S milik Bumiputera.

Tuan Yang Di Pertua,

8. Dalam hal ini, perkara utama yang perlu dilihat adalah dari segi *sustainability* PROTON untuk terus kekal berdaya saing pada masa akan datang dalam industri automotif Malaysia.

9. Kerajaan dalam hal ini juga sentiasa menggalakkan syarikat pengedar kereta sedia ada untuk menaiktaraf dari pusat 3S ke 4S untuk meningkatkan kemampuan dan *sustainability* mereka bagi jangka masa panjang. Ini juga akan membolehkan pengedars edia ada untuk menceburi bidang lain berkaitan automotif selain daripada menjadi pengedar PROTON.

10. Bagi meningkatkan tahap kompetensi pengedar PROTON termasuk Bumiputera, Kerajaan menyediakan program-program latihan seperti *Dealer Entrepreneurship Enhancement Programme* (DEEP) dan *CEO and Owner Growth Mindset Programme* yang bertujuan mentransformasi pengedar-pengedar supaya menjadi lebih berdaya saing dari segi aspek pengurusan, kewangan, teknikal dan keusahawanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 3 DISEMBER 2019 (SELASA)

SOALAN NO. 14

Minta **MENTERI PERTANIAN DAN INDUSTRI ASAS TANI** menyatakan tindakan yang diambil bagi membanteras kegiatan penyeludupan spesis endemik oleh warga asing di negara kita agar tidak terus berleluasa.

JAWAPAN

Tuan Yang Dipertua,

1. Kementerian melalui Jabatan Perkhidmatan Kuarantin dan Pemeriksaan Malaysia (MAQIS) sentiasa menjalankan pemeriksaan secara menyeluruh terhadap konsainan import dan eksport bagi produk keluaran pertanian di pintu masuk dan keluar negara, termasuk yang melibatkan spesis endemik.
2. Pemeriksaan ini bertujuan untuk memastikan pematuhan kepada prosedur dan syarat import/eksport yang ditetapkan oleh jabatan dan agensi dasar seperti Jabatan Pertanian (DOA), Jabatan Perkhidmatan Veterinar (DVS), Jabatan Perikanan (DOF), Lembaga Pemasaran Persekutuan Malaysia (FAMA) dan Lembaga Kemajuan Ikan Malaysia (LKIM) serta jabatan dan agensi di luar Kementerian ini yang berkaitan.

3. Pemeriksaan terhadap spesies endemik adalah berpandukan kepada Akta Perdagangan Antarabangsa Mengenai Spesies Terancam 2008 [Akta 686]. Ini adalah satu usaha bagi mengawal kegiatan penyeludupan spesies endemik oleh warga asing di negara kita daripada berleluasa dan menjejaskan khazanah negara.

4. Mana-mana syarikat, ejen atau individu yang ingin mengeksport atau membawa keluar produk hasil pertanian termasuk biji benih, perlulah mendapatkan permit eksport yang dikeluarkan oleh MAQIS dan Sijil Fitosanitasi daripada DOA (bagi negara yang memerlukan Sijil Fitosanitasi). Syarat pengeksportan ini tertakluk di bawah Seksyen 11(2), Akta Perkhidmatan Kuarantin dan Pemeriksaan Malaysia 2011 [Akta 728].

5. Selain daripada mengenakan syarat permit eksport, MAQIS turut meningkatkan aktiviti penguatkuasaan dengan kerjasama bersama agensi penguatkuasaan yang lain seperti Jabatan Kastam Diraja Malaysia (Kastam), Agensi Kawalan Sempadan Malaysia (AKSEM) dan Polis Diraja Malaysia (PDRM). Beberapa siri operasi bersepadu telah dijalankan secara bersama pada tahun 2019 seperti berikut:

- i. Ops Durian Burung pada April 2019
- ii. Ops Klang pada Jun 2019
- iii. Ops Tanjung Pelepas & Pasir Gudang pada Julai 2019
- iv. Ops Selatan (Batu Pahat, Kuala Linggi) pada Ogos 2019
- v. Ops Pengkalan Hulu pada September 2019

6. Selain itu, bagi membantu meningkatkan lagi keberkesanan kawalan dan pemeriksaan bagi mengurangkan risiko penyeludupan spesies endemik keluar negara, pihak MAQIS dengan kerjasama pihak Kastam dan agensi penguatkuasaan berkaitan yang lain, turut menggunakan alat pengimbas berteknologi tinggi di pos kawalan seperti di lapangan terbang antarabangsa.

Usaha yang dilaksanakan oleh MAQIS dengan kerjasama jabatan dan agensi penguatkuasaan yang lain diharapkan dapat mengawal kegiatan penyeludupan spesies endemik oleh warga asing di negara kita daripada berleluasa. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KARUPAIYA A/L MUTUSAMI
[PADANG SERAI]**

TARIKH : 3 DISEMBER 2019 (SELASA)

SOALAN NO. 15

Minta **MENTERI PENDIDIKAN** menyatakan Kementerian perlu membuat satu kajian terperinci untuk sekolah-sekolah yang daif terutamanya tandas. Ini adalah kerana kebanyakan sekolah masih tidak mempunyai sistem tandas yang lengkap, di mana bekalan elektrik tidak sempurna, bekalan air tidak mencukupi, sistem kumbahan tidak dirawat dan diperbaiki, kebersihan tandas tidak terjamin dan berbau. Tandas masih tidak selesa untuk kegunaan murid-murid.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha memastikan semua rakyat Malaysia menikmati ruang yang kondusif untuk pembelajaran. KPM juga konsisten dalam memastikan proses pembelajaran murid-murid bersifat inklusif kepada semua. Pelaksanaan program pembangunan semula sekolah daif akan terus menjadi keutamaan. Ke arah itu, KPM telah mengenal pasti dan membuat semakan terperinci terhadap sekolah-sekolah yang memerlukan pembaikan. Keutamaan diberikan kepada sekolah yang telah mendapat pengesahan tidak selamat daripada pihak Jabatan Kerja Raya (JKR).

Pembangunan semula dan naik taraf sekolah daif di Semenanjung, Sabah dan Sarawak secara asasnya merangkumi beberapa skop pembinaan seperti pembinaan bilik darjah, asrama, dewan makan, dewan belajar, bilik sains, blok pentadbiran, rumah guru dan tandas. Daripada 577 buah projek sekolah daif di seluruh negara, sebanyak 293 projek sekolah daif telah dilaksanakan dari tahun 2016 sehingga 2019 yang melibatkan skop pembinaan tandas. Kos keseluruhan bagi pembinaan sekolah daif yang melibatkan skop pembinaan tandas ini berjumlah RM853 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 3 DISEMBER 2019 (SELASA)

SOALAN

Minta **MENTERI PERTANIAN DAN INDUSTRI ASAS TANI** menyatakan bagaimanakah fungsi FAMA dalam membantu petani miskin dalam memasarkan hasil tanaman mereka seperti duku, langsung dan lain-lain bagi mengatasi masalah lambakan buah di kebun kerana masalah harga upah memetik lebih mahal daripada harga pasaran.

JAWAPAN

Yang di-Pertua,

1. Untuk makluman Ahli Yang Berhormat, Lembaga Pemasaran Pertanian Persekutuan (FAMA) ditubuhkan di bawah Kementerian Pertanian dan Industri Asas Tani sebagai agensi yang bertanggungjawab dalam pemasaran produk agromakanan seperti sayur-sayuran dan buah-buahan serta produk industri asas tani. Bagi melaksanakan tanggungjawab ini, FAMA sentiasa berusaha untuk membantu petani miskin dalam memasarkan hasil tanaman mereka supaya para petani kecil menerima pulangan hasil yang setimpal. Antara inisiatif yang telah dijalankan oleh FAMA bagi membantu petani miskin memasarkan hasil tanaman mereka adalah seperti berikut:

i. Program Motosikal 3 Roda (M3R)

Program ini diwujudkan bagi mengatasi masalah lebihan hasil pertanian di kawasan pedalaman dan luar bandar yang sukar dimasuki oleh lori. Usahawan M3R berperanan untuk mewujudkan jaringan pemasaran dari petani terus ke Agro Bazaar Kedai Rakyat, Gerai Buah-Buahan Segar, Pasar Tani dan outlet runcit yang berhampiran dengan kawasan pengeluaran.

ii. Belian Terus FAMA

Terdapat sebanyak 40 Pusat Operasi FAMA di seluruh Malaysia yang berfungsi untuk membeli hasil tanaman daripada petani. Hasil tanaman tersebut seterusnya akan dipasarkan ke outlet-outlet peruncitan di bawah FAMA seperti pasar tani, gerai buah-buahan segar dan agrobazaar kedai rakyat bagi memperoleh nilai jualan yang lebih baik. Negeri-negeri yang mempunyai permintaan yang tinggi terhadap hasil tanaman ini ialah Kuala Lumpur, Selangor, Johor, Pulau Pinang dan Pahang.

Sehingga Oktober 2019, jumlah belian Pusat Operasi FAMA adalah sebanyak 21,334 metrik tan dengan nilai jualan sebanyak RM32.09 juta. Daripada jumlah tersebut, sebanyak 805.7 metrik tan merupakan buah-buahan bermusim seperti duku, rambutan dan langsung dengan nilai belian sebanyak RM3.14 juta. FAMA telah membeli 345 metrik tan duku dari Terengganu dengan nilai belian sebanyak RM475,000.

iii. Pengaturan Pasaran

FAMA juga membantu memasarkan hasil tanaman petani melalui pengaturan program-program jualan seperti program Jualan Terus Dari Ladang, FAMA Fest, My Best Buy dan Karnival Harum Manis sebagai platform kepada petani untuk

memasarkan hasil pertanian mereka terus kepada pengguna.

iv. Kempen Lebihkan Makan Buah-Buahan Tempatan

Selain aktiviti belian dan pemasaran, FAMA turut menjalankan program promosi buah-buahan tempatan bagi meningkatkan permintaan dan penggunaan buah-buahan tempatan oleh rakyat Malaysia. Antara program yang dijalankan adalah Kempen Lebihkan Makan Buah-Buahan Tempatan yang diadakan di seluruh negara. Melalui kempen ini, sebanyak 120 program telah diadakan pada bulan Januari hingga Ogos 2019 dengan nilai jualan dianggarkan berjumlah RM2.5 juta.

Untuk makluman Yang Berhormat juga, pelancaran Kempen Lebihkan Makan Duku Terengganu telah disempurnakan oleh KDYMM Yang di-Pertuan Agong pada 30 Ogos 2019 di Taman Botani, Putrajaya sempena Royal Floria Putrajaya 2019.

2. FAMA akan terus meningkatkan usaha bagi membantu memastikan hasil pertanian petani miskin dapat dipasarkan pada harga yang setimpal dan seterusnya meningkatkan pendapatan petani.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 3 DISEMBER 2019 (SELASA)

SOALAN NO. 17

Minta **MENTERI PENDIDIKAN** menyatakan jumlah peruntukan yang sudah disalurkan ke Sabah untuk tujuan pembaikan/pembinaan baru sekolah-sekolah daif yang banyak di Sabah.

JAWAPAN

Tuan Yang di-Pertua,

Untuk makluman Ahli Yang Berhormat, pelaksanaan naik taraf dan pembangunan semula sekolah daif di negeri Sabah melibatkan 153 buah sekolah dengan kos projek berjumlah RM552.152 juta melalui peruntukan pembangunan dan *Private Finance Initiative* (PFI). Untuk pelaksanaan projek daif tahun 2018, sebanyak 120 buah sekolah daif telah dinaik taraf dengan kos sebanyak RM429.741 juta.

Bagi pelaksanaan tahun 2019, peruntukan sebanyak RM10 juta telah diluluskan melibatkan naik taraf dan pembangunan semula tiga (3) buah sekolah daif di Sabah. Kesemua projek ini akan dilaksanakan oleh pihak Jabatan Kerja Raya (JKR) secara tender terbuka. Projek-projek ini dalam peringkat pelaksanaan dokumen tender untuk perolehan.

Selain daripada itu, Kementerian Kewangan melalui surat bertarikh 30 Ogos 2019 telah meluluskan peruntukan sebanyak RM78 juta bagi Pembangunan Semula Sekolah Daif di Sabah di bawah Peruntukan *Private Finance Initiative* (PFI) yang melibatkan 19 buah sekolah di negeri Sabah. Projek-projek ini akan dilaksanakan oleh JKR dan dijangka akan ditender pada Disember 2019.

Bagi memperkasakan penyelenggaraan aset bangunan, aset tanah dan aset infrastruktur di sekolah dan institusi pendidikan Kerajaan di Sabah, KPM telah menyalurkan peruntukan berjumlah RM27,490,045.80 kepada Jabatan Pendidikan Negeri (JPN) Sabah pada tahun 2019.

Peruntukan yang disalurkan adalah untuk mengekalkan fungsi aset berkenaan, kerja-kerja penyelenggaraan secara berkala (*periodical maintenance*) dan penyelenggaraan pembaikan (*corrective maintenance*) berdasarkan permohonan daripada JPN Sabah.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SRI ABDUL AZEEZ BIN ABDUL
RAHIM [BALING]**

TARIKH : 3 DISEMBER 2019 (SELASA)

SOALAN

**Dato' Sri Abdul Azeez bin Abdul Rahim [Baling] minta MENTERI
PEMBANGUNAN WANITA, KELUARGA DAN MASYARAKAT**
menyatakan apakah pelan persediaan khas yang dirangka Kerajaan untuk
generasi warga emas bagi tahun 2020-2030.

JAWAPAN:

Tuan Yang di-Pertua,

Berdasarkan kepada data unjuran penduduk oleh Jabatan Perangkaan Malaysia, negara kita akan mencapai status negara tua pada tahun 2030 dengan jumlah warga emas atau mereka yang berumur 60 tahun dan ke atas seramai 5.80 juta orang atau 15.3% daripada jumlah penduduk. Sebagai persediaan awal, Kerajaan telah menggubal Dasar Warga Tua sejak tahun 1995 di mana dasar tersebut telah disemak semula dan dipinda pada tahun 2011 selaras dengan perubahan demografi, keperluan semasa dan cabaran masa hadapan. Di samping itu, Dasar dan Pelan Tindakan Warga Emas Negara (PTWEN) juga telah digubal dan dilaksanakan bagi tempoh sepuluh tahun iaitu dari tahun 2011 hingga tahun 2020.

Bagi memastikan kesejahteraan warga emas menjelang tahun 2030 dan tahun seterusnya, Kementerian dalam perancangan untuk menyediakan hala tuju bagi persediaan Malaysia ke arah negara tua pada 2030 dari segi penilaian semula Dasar dan Pelan Tindakan Warga Emas Negara sedia ada. Pembangunan hala tuju ini amat penting dalam merangka strategi, program dan tindakan yang perlu bagi memastikan keperluan sebenar warga emas dapat dipenuhi menjelang 2030.

Pada tahun ini, KPWKMM sedang melaksanakan kajian bagi meneliti pembangunan skop, kerangka dan kandungan untuk menggubal satu akta khusus bagi warga emas. Hasil utama kajian adalah penggubalan satu akta khusus bagi warga emas, yang dijangka akan dibentangkan di Parlimen pada tahun 2021, yang menumpukan kepada mempertingkatkan perlindungan dan hak asasi warga emas di Malaysia.

Kementerian juga sedang melaksanakan Kajian Diagnostik Bagi Membentuk Model Penjagaan Warga Emas Jangka Masa Panjang Yang Bersepadu dan Mapan di Malaysia yang dijangka selesai pada penghujung tahun 2020. Hasil yang dijangkakan adalah pembentukan model pembiayaan serta model penjagaan yang bersepadu serta pelan tindakan pelaksanaan penjagaan jangka masa panjang. Kajian ini akan

mengambil kira keperluan jagaan kesihatan dan sosial di institusi serta di komuniti.

Tuan Yang di-Pertua,

Saya ingin menegaskan sekali lagi bahawa isu penuaan merupakan isu sejagat yang merupakan tanggungjawab bersama semua pihak. Isu ini memerlukan komitmen dan kolaborasi sepenuhnya di peringkat Kerajaan Persekutuan, Kerajaan Negeri, Pihak Berkuasa Tempatan (PBT), pihak swasta, ahli akademik, Pertubuhan Bukan Kerajaan (NGO), komuniti, keluarga dan warga emas sendiri. Kementerian akan terus komited dan mengalu-alukan kerjasama semua pihak termasuk Yang Berhormat Ahli Dewan sekalian untuk bekerjasama dengan Kementerian dan Jabatan Kebajikan Masyarakat dalam memberikan sokongan terhadap semua inisiatif yang dilaksanakan untuk golongan warga emas.

PEMBERITAHU PERTANYAAN
DEWAN RAKYAT, MALAYSIA
MESYUARAT KETIGA, PENGGAL KEDUA PARLIMEN KE-14

PERTANYAAN : LISAN

DARIPADA : DATO' SRI MUSTAPA BIN MOHAMED [JELI]

TARIKH BAHAS : 3 DISEMBER 2019

SOALAN

DATO' SRI MUSTAPA BIN MOHAMED [JELI] minta **MENTERI PERDAGANGAN ANTARABANGSA DAN INDUSTRI** menyatakan 5 pelaburan asing terbesar yang diluluskan pada tahun 2016, 2017 dan 2018 yang telah dilaksanakan. Berapa peluang pekerjaan yang diwujudkan mengikut tahap kemahiran.

JAWAPAN

Tuan Yang di-Pertua,

1. Kerajaan sentiasa komited dalam mengukuhkan usaha untuk terus menarik pelaburan asing terutamanya yang berkualiti tinggi ke dalam negara secara konsisten. Bagi tempoh 2016 hingga 2018, Kerajaan telah meluluskan sebanyak 2,141 projek dalam sektor perkilangan dengan jumlah pelaburan sebanyak RM209.5 bilion. Daripada jumlah tersebut, sebanyak RM107.3 bilion melibatkan pelaburan langsung asing dan setakat Jun 2019, sebanyak RM52.4 bilion nilai pelaburan telah berjaya dilaksanakan.

2. Pada tahun 2016, lima (5) pelaburan asing yang terbesar adalah dari negara-negara China, Belanda, United Kingdom, Republik Korea dan Jerman dengan pelaburan bernilai RM13.0 bilion dimana jumlah pekerjaan yang telah diwujudkan adalah sebanyak 14,784. Daripada jumlah tersebut, sebanyak 3,755 peluang pekerjaan atau 25% terdiri daripada kategori pengurusan, teknikal & penyeliaan; 1,918 atau 13% di dalam kategori tenaga mahir; 8,102 atau 55% di dalam kategori operator mesin & pekerja

pemasangan dan 1,009 atau 7% di dalam kategori pekerja jualan, pengkeranian dan lain-lain.

3. Bagi tahun 2017, lima (5) pelaburan asing yang terbesar adalah dari negara-negara Switzerland, Singapura, Belanda, Jerman dan Jepun dengan pelaburan bernilai RM9.0 bilion. Jumlah peluang pekerjaan yang berjaya diwujudkan pula adalah sebanyak 12,371. Daripada jumlah tersebut, sebanyak 2,236 peluang pekerjaan atau 18% terdiri daripada kategori pengurusan, teknikal & penyeliaan; 2,108 atau 17% kategori di dalam tenaga mahir; 6,342 atau 51% di dalam kategori operator mesin & pekerja pemasangan; 1,643 atau 13% di dalam kategori pekerja jualan, pengkeranian & lain-lain dan 42 atau 0.3% adalah dari kategori pekerja am.

4. Akhir sekali bagi tahun 2018, lima (5) pelaburan asing yang terbesar adalah dari negara-negara Belanda, Jepun, China, Amerika Syarikat dan Singapura dengan pelaburan bernilai RM13.4 bilion dengan jumlah peluang pekerjaan yang telah dapat diwujudkan adalah sebanyak 12,442. Daripada jumlah tersebut, sebanyak 2,810 peluang pekerjaan atau 23% terdiri daripada kategori pengurusan, teknikal & penyeliaan; 1,312 atau 11% di dalam kategori tenaga mahir; 6,785 atau 54% di dalam kategori operator mesin & pekerja pemasangan; 665 atau 5% di dalam kategori pekerja jualan, pengkeranian & lain-lain dan 870 atau 7% adalah dari kategori pekerja am.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' SERI HAJI IDRIS BIN JUSOH [BESUT]

TARIKH : 3 DISEMBER 2019 (SELASA)

SOALAN NO. 20

Minta **MENTERI PENDIDIKAN** menyatakan apakah langkah-langkah terkini yang telah diperkenalkan pihak Kementerian ke atas para pensyarah untuk menghadapi Revolusi Industri 4.0 (IR 4.0).

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa menumpukan usaha untuk mereka bentuk kurikulum pendidikan dan latihan pensyarah yang bersesuaian dengan keperluan semasa ke arah melahirkan pelajar dan graduan yang boleh menyesuaikan diri dan mampu menghadapi cabaran di era Revolusi Industri (IR) 4.0. Di peringkat Institut Pendidikan Guru (IPG), selaras dengan perkembangan terkini teknologi digital dan perkembangan Revolusi Industri 4.0, KPM telah mengambil pelbagai langkah, antaranya:

- a) memantapkan kurikulum dan latihan perguruan dengan menggubal Dasar Pembelajaran Digital IPG;
- b) membangunkan 25 '*digital learning object*' yang digunakan sebagai panduan kepada pensyarah-pensyarah IPG untuk membangunkan bahan digital berteraskan konsep *New Pedagogies for Deep Learning (NPDL)* dalam usaha membudayakan pembelajaran digital di IPG;

- c) menawarkan biasiswa berkaitan IR 4.0 bagi pengajian peringkat Sarjana, sebanyak 15 tempat dan Kedoktoran sebanyak 5 tempat kepada guru dan pensyarah IPG dengan kerjasama Universiti Putra Malaysia. Di antara bidang pengajian tersebut termasuklah Teknologi Pendidikan, Sains Komputer dan Teknologi Pengajaran;
- d) bekerjasama dengan *Malaysia Digital Economy Corporation* (MDEC) untuk latihan *Computational Thinking and Computer Science*. Sehingga kini, seramai 80 orang pensyarah IPG yang telah mendapat sijil pengiktirafan sebagai Jurulatih Utama daripada *British Computing Society* (BCS), United Kingdom. Jurulatih Utama *Computational Thinking* IPG telah melatih 600 orang guru Reka Bentuk dan Teknologi (RBT) Tahun 4 dari seluruh Malaysia pada bulan Julai 2019 hingga September 2019; dan
- e) bekerjasama dengan Universiti Kebangsaan Malaysia (UKM) dan Syarikat Exxonmobil sebagai penaja program untuk melatih 50 orang pensyarah IPG dalam program STEM *Training of Trainers* (ToT) – *Basic and Enhancement Programme* bagi membangunkan kemahiran menggunakan teknologi dalam *IR 4.0*. Turut diadakan Kursus Kebitaraan STEM dengan menggunakan kepakaran UKM telah melatih 30 orang pensyarah IPG dari bidang Sains dan Matematik.

Persediaan menghadapi IR 4.0 turut dilaksanakan di peringkat pendidikan TVET melalui beberapa inisiatif mengambil kira keperluan industri. Elemen IR seperti *Internet of Things* (IoT), *business on-line* dan sebagainya turut diberi penekanan agar kompetensi seluruh tenaga pengajar di Kolej Vokasional selari dengan keperluan semasa. Para pengajar di Kolej Vokasional juga boleh mengambil manfaat daripada pelantikan *Technical Advisory Committee* (TAC) untuk setiap program diploma yang ditawarkan bermula tahun 2018. TAC ini dianggotai oleh pakar akademik dan industri bagi menyemak dan menilai pengisian kurikulum agar bersesuaian dengan keperluan Revolusi Perindustrian 4.0 (IR 4.0).

Selain daripada itu, sejak tahun 2018, KPM dengan Kementerian Sumber Manusia (KSM) merupakan pengerusi bersama dalam Jawatankuasa Kerja Pembangunan Kemahiran dan Bakat (*Technical Working Group for Skills – TWG-S*) di bawah dasar *Industry4WRD*. Melalui *TWG-S*, sebanyak RM 2.5 juta telah diperuntukkan kepada KPM untuk program *Training of Trainers (ToT)* bagi tahun 2019. Melalui program *ToT*, pensyarah universiti awam, politeknik, kolej komuniti, dan guru-guru sekolah diberikan latihan untuk mempersiapkan mereka dengan teknologi terkini seiring dengan perkembangan Revolusi Industri 4.0 (IR 4.0). Antara latihan yang diberikan adalah *internet system integration of things (IOT)*, *artificial intelligence*, *cloud computing*, *big data analytics*, *cybersecurity*, *system integration* dan *additive manufacturing*.

KPM juga sedang dalam proses membangunkan Kerangka Pelan Tindakan IR4.0. Kerangka ini akan menjadi panduan kepada semua bahagian, jabatan, agensi dan institusi pendidikan di bawah KPM dalam merangka dan melaksana program berkaitan IR4.0 bagi semua peringkat pendidikan.

Untuk makluman Ahli Yang Berhormat, semenjak bermulanya Revolusi Industri 4.0 (IR4.0), pihak Kementerian melalui Jabatan Pendidikan Politeknik dan Kolej Komuniti (JPPKK) telah mengambil langkah proaktif dengan mengolah semula pelaksanaan *Continuing Professional Development (CPD)* bagi Pegawai Pendidikan Pengajian Tinggi (PPPT) agar ia selari dengan sembilan (9) tonggak 4IR yang digariskan dan ianya ditambah baik dari semasa ke semasa. Pada masa ini, objektif CPD berkaitan adalah untuk menyediakan pensyarah di politeknik dan kolej komuniti untuk mendepani cabaran revolusi itu sendiri.

Terdapat empat (4) jenis program latihan berkaitan IR4.0 yang dikendalikan oleh JPPKK seperti Program Pembangunan Profesional (Tajaan Biasiswa SHLP KPM PPPT) sebanyak 17 kursus melibatkan 30 orang pensyarah, Program Pembangunan Kompetensi (Persijilan Profesional/ Persijilan Industri) sebanyak 14 kursus melibatkan 195 orang pensyarah, Program Pembangunan Kompetensi (Program Peningkatan Kemahiran – PPK) sebanyak 19 kursus melibatkan 195

NO. SOALAN: 20

orang pensyarah dan Program Di Bawah Peruntukan Khas TWG 4IR 2019 KPM-KSM-MITI pula menawarkan 3 kursus melibatkan 90 orang pensyarah. Sepanjang tahun 2019, secara keseluruhan JPPKK telah menawarkan sebanyak 53 kursus bagi melatih seramai 930 orang pensyarah dalam latihan berkaitan IR4.0 sebagai persediaan kepada para pensyarah untuk menghadapi Revolusi Industri 4.0 (IR 4.0).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : DR. KELVIN YII LEE WUEN
[BANDAR KUCHING]
TARIKH : 3.12.2019 (SELASA)

SOALAN NO. 21

DR. KELVIN YII LEE WUEN [BANDAR KUCHING] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan syarikat-syarikat di Sarawak yang mendapat AP untuk mengimport gula serta langkah-langkah Kementerian untuk memecahkan mana-mana monopoli yang merugikan rakyat.

JAWAPAN

Tuan Yang di-Pertua,

Untuk makluman, terdapat sebelas syarikat pengeluar makanan dan minuman di Sarawak yang telah diluluskan AP import gula bertapis pada tahun 2019. KPDNHEP sentiasa menjaga keseimbangan antara industri di peringkat kilang dan pemprosesan produk serta kebajikan pengguna bagi mengelakkan wujudnya monopoli oleh mana-mana pihak.

Agensi di bawah KPDNHEP, Suruhanjaya Persaingan Malaysia (MyCC) adalah Ahli Bersekutu di dalam Jawatankuasa Kajian Semula Dasar Monopoli Perkhidmatan dan Pembekalan yang dipengerusikan oleh Menteri Hal Ehwal Ekonomi. MyCC telahpun memberikan input mereka kepada jawatankuasa berkenaan 4 monopoli iaitu PUSPAKOM, BERNAS, Pharmaniaga dan MyEG. Halatuju konsesi keempat-empat syarikat akan ditentukan oleh Kerajaan selepas syor jawatankuasa ini dibentangkan di dalam Mesyuarat Kabinet.

Perlu ditekankan disini bahawa undang-undang persaingan membenarkan kewujudan monopoli atau syarikat di dalam apa-apa pasaran. Walaubagaimanapun, MyCC di bawah bidang kuasanya melalui Seksyen 10 Akta Persaingan 2010 mempunyai kuasa untuk menyiasat mana-mana syarikat yang menyalahgunakan kedudukan monopoli atau dominan di dalam pasarannya seperti mengenakan jualan terikat, keengganan untuk membekalkan, mengehad pengeluaran dan mengenakan syarat-syarat berbeza untuk transaksi yang sama.

MyCC telah banyak menyiasat syarikat monopoli atau dominan seperti Megasteel, Giga Shipping Sdn. Bhd., MyEG Sdn. Bhd., DagangNet Sdn. Bhd. dan lain-lain lagi. MyEG Sdn. Bhd. telah pun dikenakan denda sebanyak RM9.4 juta kerana menyalahgunakan kedudukannya sebagai syarikat yang memonopoli pasaran pembaharuan Pas Lawatan Kerja Asing (PLKS).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA DR. MAXIMUS
JOHNITY ONGKILI [KOTA MARUDU]**

TARIKH : 3 DISEMBER 2019 (SELASA)

SOALAN NO. 22

Minta **MENTERI PERTANIAN DAN INDUSTRI ASAS TANI** menyatakan apakah strategi dan langkah-langkah terkini yang digubal dan dilaksanakan untuk mempromosi dan meningkatkan nilai eksport hasil-hasil pertanian negara. Bagaimanakah Kementerian mengatasi saingan dari negara-negara ASEAN yang lain yang mengeluarkan hasil-hasil pertanian yang sama.

JAWAPAN

Yang Dipertua,

1. Malaysia mempunyai pelbagai produk hasil pertanian yang berpotensi untuk dieksport ke luar negara. Produk-produk tersebut antaranya adalah nanas, nangka, rambutan dan produk bernilai tinggi seperti sarang burung walit, durian, rumpai laut dan lain-lain. Kementerian sangat komited dalam mempromosi dan meningkatkan nilai eksport hasil pertanian negara ke negara-negara berpotensi.

2. Sehingga tahun 2018, Singapura, China, Indonesia, Thailand dan Viet Nam merupakan lima (5) pasaran eksport utama hasil pertanian Malaysia. Nilai eksport ke negara-negara tersebut adalah berjumlah RM14.6 bilion atau 46.4% daripada jumlah keseluruhan

eksport agromakanan Malaysia bagi tahun 2018. Di samping itu, produk-produk hasil pertanian Malaysia turut menerima permintaan tinggi terutamanya dari negara-negara ASEAN, Jepun, Korea Selatan, Timur Tengah, Australia, New Zealand dan Amerika Syarikat.

3. Bagi mempergiatkan promosi dan meningkatkan nilai eksport hasil pertanian negara, Kementerian telah memperkemas langkah dan strategi terkini di bawah dokumen Hala Tuju MOA: Prioriti dan Strategi 2019-2020. Penekanan diberikan kepada penerokaan pasaran baharu, penyertaan di dalam ekspo dan misi perdagangan, penganjuran program promosi secara bersasar dan sesi penemusuaan.

4. Bagi tahun 2019, Kementerian telah mula meneroka pasaran baharu seperti Qatar, Perancis dan Hungary melalui penyertaan di dalam ekspo perdagangan utama di negara-negara tersebut. Selain itu, Kementerian juga mengambil inisiatif untuk memperkukuhkan pasaran sedia ada dengan penganjuran program promosi seperti Malaysia Durian Festival di Nanning, China, Malaysia Fair di Tokyo, Jepun dan Malaysia Street Food di Bangkok, Thailand. Tujuan program ini dilaksanakan adalah untuk memberi pendedahan di dalam bentuk pendidikan kesedaran (*awareness*) kepada konsumen seperti cara memakan, maklumat nutrisi dan kesihatan, dan sebagainya. Sehingga September 2019, Kementerian telah menyertai 34 ekspo perdagangan, program promosi *in-store* dan penganjuran festival di luar negara. Hasil penyertaan dan penganjuran program promosi tersebut telah mencatatkan potensi jualan sebanyak RM265 juta melalui aktiviti penemusuaan dengan pengimport berpotensi. Program yang dilaksanakan ini turut melibatkan kerjasama Kementerian, Jabatan dan Agensi dengan pihak pengimport yang membantu melaksanakan aktiviti seperti persampelan, demonstrasi masakan dan uji rasa.

5. Bagi mengatasi saingan negara ASEAN yang mengeluarkan produk hasil pertanian yang sama, Kementerian mengambil pendekatan dengan mengetengahkan perkara-perkara seperti berikut:-

a. Keunikan

Produk hasil pertanian yang dikeluarkan mempunyai ciri-ciri unik dan istimewa berbanding dengan produk yang sama dari negara-negara lain. Sebagai contoh, durian Musang King yang mempunyai rasa dan aroma unik berbanding durian Musang King dari Thailand. Begitu juga dengan mangga Harumanis yang mempunyai tekstur isi yang lebih serat berbanding Harumanis dari Indonesia.

b. Kualiti dan daya jejak

Memberi penekanan kepada amalan pertanian baik dan daya jejak di dalam mempromosi hasil pertanian di luar negara. Perkara ini menjadi salah satu kriteria semasa siri rundingan akses pasaran dengan pihak kompeten di negara pengimport. Amalan pertanian baik dan sistem daya jejak dapat meyakinkan dan memberikan kepercayaan kepada para pengguna di negara pengimport memandangkan ia dapat menghasilkan kualiti pengeluaran yang konsisten dan mengurangkan risiko penyakit.

c. Varieti dan baka baru

Aktif menghasilkan varieti dan baka baru yang lebih baik dari segi kualiti dan pengeluaran, rasa, tekstur, aroma dan sebagainya berbanding dengan varieti yang ada di negara-negara lain. Sebagai contoh MARDI telah menghasilkan rambutan varieti Mutiara Wangi dan Mutiara Merah di mana pokoknya lebih rendah, mampu berbuah awal daripada klon popular lain, mempunyai isi yang tebal, manis dan lekat serta mempunyai aroma ketara.

d. Akta Perlindungan Varieti Baru Tumbuhan 2004

Meningkatkan penguatkuasaan Akta Perlindungan Varieti Baru Tumbuhan 2004 yang memberi hak kepada pembiakbaka yang dapat menghasilkan varieti baru tumbuhan, supaya varieti tersebut boleh dilindungi daripada dibiak oleh negara-negara lain yang berpotensi menjejaskan pengeluaran negara.

e. Produk dengan nilai tambah

Pengeluaran produk dengan nilai tambah memberi variasi kepada pengguna. Usahawan digalakkan berinovasi untuk menghasilkan produk baharu, sebagai contoh produk berasaskan durian seperti ais krim durian, mochi, moon cake dan lain produk yang memenuhi citarasa negara pengimport, bagi meningkatkan permintaan produk-produk ini di luar negara.

f. Penerokaan potensi bagi pasaran Halal

Pengiktirafan pasaran global terhadap persijilan Halal Malaysia memberi satu nilai tambah terhadap jenama produk dari Malaysia. FAMA dengan kerjasama JAKIM sedang merangka kerjasama strategik bagi memudahcara proses akreditasi Halal. Selain itu, beberapa pusat pemprosesan yang berakreditasi GMP dan Halal di 15 lokasi turut dibangunkan bagi membantu usahawan meningkatkan kapasiti pengeluaran mereka.

6. Kementerian berserta Jabatan dan Agensi di bawahnya akan meneruskan usaha mengkomersilkan serta mempromosikan produk hasil pertanian di pasaran luar negara khususnya bagi memastikan ianya dapat meningkatkan nilai eksport. Usaha berterusan bukan sahaja di pihak Kerajaan bahkan di pihak swasta diperlukan untuk memastikan bekalan yang konsisten dan berkualiti untuk tujuan eksport.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 3 DISEMBER 2019 (SELASA)

SOALAN

Puan Maria Chin binti Abdullah [Petaling Jaya] minta **MENTERI PEMBANGUNAN WANITA, KELUARGA DAN MASYARAKAT** menyatakan kemaskini status “National Children’s Well-Being Roadmap” dan adakah geran sokongan kanak- kanak atau elaun penjagaan kanak-kanak yang disyorkan UNICEF akan dikaji.

JAWAPAN

Tuan Yang di-Pertua,

STATUS “NATIONAL CHILDREN’S WELL-BEING ROADMAP”

Pada masa ini, Kementerian sedang menyemak semula Dasar Kanak-Kanak Negara, Dasar Perlindungan Kanak-Kanak dan juga elemen kanak-kanak dalam Dasar Kesihatan Reproduktif dan Sosial untuk menjadi satu dasar kanak-kanak yang lebih komprehensif. Dalam usaha ini, Peta Laluan Kesejahteraan Kanak-Kanak Kebangsaan atau *National Children Well-Being Roadmap* (NCWR) kini dicadang dimasukkan sebagai input dalam semakan semula Dasar Kanak-Kanak Negara yang baharu.

GERAN SOKONGAN KANAK- KANAK ATAU ELAUN PENJAGAAN KANAK-KANAK YANG DISYORKAN UNICEF

Tuan Yang di-Pertua,

Kerajaan maklum akan salah satu cadangan untuk menyediakan “*Universal Child Care Allowance*” yang dikemukakan melalui kajian “*Children Without*” yang dilaksanakan oleh UNICEF pada tahun 2017. Kerajaan menyambut baik cadangan ini dan akan terus meneliti kesesuaian pelaksanaan seiring dengan program-program semasa Kerajaan.

Sebagai usaha memastikan kanak-kanak mendapat akses kepada asuhan dan jagaan yang sewajarnya, Kementerian memberi penekanan kepada penubuhan TASKA di sektor awam. Pada tahun 2019, 66 buah TASKA di tempat kerja sektor awam telah ditubuhkan, manakala pada tahun 2020 fokus penubuhan TASKA akan melibatkan TASKA di hospital dan sekolah.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD JOHNNIE BIN ZAWAWI
[IGAN]**

TARIKH : 3 DISEMBER 2019 (SELASA)

SOALAN

Tuan Ahmad Johnnie Bin Zawawi [Igan] minta **MENTERI PERTANIAN DAN INDUSTRI ASAS TANI** menyatakan apakah perancangan pihak Kementerian untuk menambahbaik pendapatan para petani di kawasan parlimen Igan khususnya dalam menarik minat para belia berkecimpung dalam bidang pertanian sebagai satu perniagaan.

JAWAPAN

Tuan Yang di-Pertua,

1. Kementerian Pertanian dan Industri Asas Tani (MOA) telah merangka dan mengetengahkan lapan (8) idea utama di dalam Dasar Agromakanan Negara (DAN) bagi membangunkan sektor agromakanan. Salah satu idea utama tersebut adalah pembangunan modal insan pertanian bestari dan berinformasi. Pembangunan modal insan yang berpengetahuan, berkemahiran serta produktiviti berintensifkan teknologi dan inovasi akan diberikan tumpuan supaya dapat menyokong serta menggalakkan penglibatan golongan muda di dalam sektor agromakanan seluruh negara termasuk di kawasan parlimen Igan.

2. MOA juga mengambil langkah proaktif melancarkan Hala Tuju Kementerian Pertanian dan Industri Asas Tani: Prioriti dan Strategi 2019 – 2020. Dokumen Hala Tuju ini mengandungi lima (5) Hala Tuju yang dibangunkan bersama 18 strategi dan 51 inisiatif untuk dilaksanakan sepanjang tempoh 2019 hingga 2020.

3. Pembangunan agropreneur muda telah diberikan keutamaan di dalam Hala Tuju ke 3 iaitu Menjadikan Pertanian sebagai Satu Sumber Pendapatan yang Mampan dan Kukuh serta Menguntungkan untuk Petani, Penternak, Nelayan dan Agropreneur Muda. Melalui Strategi 3 Pembangunan Agropreneur Muda dalam Bidang Agromakanan telah ditetapkan inisiatif iaitu Program Agropreneur Muda (PAM) yang dilancarkan bagi tujuan menarik minat agropreneur muda yang berumur di antara 18 hingga 40 tahun untuk menceburi sektor agromakanan.

4. PAM menawarkan bantuan geran berbentuk barangan dan pembiayaan kepada golongan muda. Bantuan khidmat nasihat teknikal, rundingan serta latihan bagi membangunkan projek-projek pertanian yang akan dilaksanakan turut disediakan. Program ini terbukti mampu meningkatkan pendapatan para petani. Untuk makluman, seramai 377 agropreneur muda Sarawak telah mendapat kelulusan Geran Agropreneur Muda (GAM) yang berjumlah RM 5,982,350.00. Secara keseluruhannya, dari tahun 2016 sehingga Oktober 2019, seramai 5,449 agropreneur muda seluruh negara yang berjumlah RM 95,140,100.00 telah mendapat manfaat daripada PAM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. HAJI ABD. LATIFF BIN AHMAD
[MERSING]**

TARIKH : 3 DISEMBER 2019 (SELASA)

SOALAN NO. 25

Minta **MENTERI PENDIDIKAN** menyatakan apakah usaha dan insentif Kementerian untuk menggalakan universiti awam melakukan kajian berimpak tinggi kepada masyarakat dan industri. Adakah usaha dilakukan untuk mendapatkan dana penyelidikan dari organisasi luar negara.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) mengambil langkah proaktif dan inovatif melalui penyusunan semula pelaksanaan penyelidikan mengikut keutamaan dan bidang-bidang strategik negara. Pelaksanaan penyelidikan dalam bidang-bidang keutamaan ini mengambil kira isu-isu penting nasional dan keperluan semasa negara. Langkah ini merupakan inisiatif KPM dalam memastikan penyelidikan yang dilaksanakan adalah berimpak serta berpotensi untuk diterjemah dalam menangani isu negara serta bertepatan dengan dasar dan hala tuju nasional.

Penstrukturan semula ini juga mengambil kira perancangan masa hadapan yang mana penyelidikan dilaksanakan secara bersama dengan pelbagai sektor sebagai langkah perkongsian sumber di samping memperkukuh reputasi UA melalui jaringan kerjasama yang utuh dengan pelbagai sektor dan institusi pendidikan tinggi luar dan dalam negara.

Kerajaan juga telah memperkenalkan inisiatif Malaysia *Partnership and Alliances in Research* (MyPAiR) pada tahun ini. Inisiatif ini merupakan salah satu usaha Kerajaan untuk mengukuhkan keupayaan dan memacu kecemerlangan penyelidikan Malaysia menerusi perkongsian dan kerjasama strategik. MyPAiR diperkenal bertujuan mempertingkatkan kerjasama penyelidikan antara Institusi Pendidikan Tinggi (IPT) dengan penyelidik antarabangsa serta industri dalam dan luar negara melalui kerjasama strategik dengan agensi Kerajaan dalam dan luar negara.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH : 3 DISEMBER 2019 (SELASA)

SOALAN

Puan Rubiah Binti Haji Wang [Kota Samarahan] minta MENTERI PEMBANGUNAN WANITA, KELUARGA DAN MASYARAKAT menyatakan apakah langkah Kerajaan Persekutuan untuk membela nasib ibu-ibu tunggal di Sarawak.

JAWAPAN

Tuan Yang di-Pertua,

Kementerian melalui Jabatan Pembangunan Wanita (JPW) melaksanakan Program Pusat Aktiviti Cakna Bangun Ekonomi (PACBE) yang merupakan satu program yang disusun semula dengan memberi fokus kepada Pembangunan Kapasiti dan Peningkatan Kesejahteraan Wanita. Melalui penyusunan semula fokus, adalah diharapkan ia dapat memberi impak yang lebih bermakna kepada wanita termasuklah ibu tunggal terutama dalam menambah pendapatan. Pelaksanaan Program PACBE dibahagikan kepada 3 bidang utama iaitu:

- i. Bidang ***Community-Based Enterprise (CBE)*** untuk aspek peningkatan kemahiran;
- ii. Bidang ***Psiko-pendidikan (substantif)*** untuk aspek pembangunan pendidikan sosial; dan
- iii. Bidang ***Pengupayaan (empowerment)*** untuk aspek pembangunan keupayaan.

PACBE ini dilaksanakan oleh Pejabat Pembangunan Wanita Negeri (PPWN) di seluruh negara dengan melibatkan penyertaan wanita dan 30% ibu tunggal yang berdaftar dalam Sistem iWanita. Pada tahun 2018, sebanyak 648 PACBE telah dilaksanakan dengan penglibatan seramai 10,201 orang peserta. Sehingga 30 September 2019, sebanyak 521 PACBE dilaksanakan melibatkan seramai 9,131 orang peserta termasuk ibu tunggal.

Lembaga Penduduk dan Pembangunan Keluarga Negara (LPPKN) juga turut melaksanakan program MamaCare, iaitu perkhidmatan penjagaan selepas bersalin yang selamat secara tradisional dan moden termasuk ilmu keibubapaan, bertujuan membantu wanita warga emas, ibu tunggal dan wanita yang layak dari golongan isi rumah berpendapatan rendah (B40) menambah pendapatan keluarga melalui latihan kapasiti MamaCare. Dari tahun 2014 sehingga 2019, seramai 120 orang peserta dari negeri Sarawak telah dilatih dalam program Mamacare. Manakala jumlah ibu tunggal yang menyertai program Mamacare di negeri Sarawak pada tahun 2019 adalah seramai 5 orang.

Kementerian juga telah memperkenalkan Program Caruman Sukarela Insentif Suri atau i-Suri khas untuk golongan wanita termasuk ibu tunggal bagi membantu meningkatkan simpanan suri rumah di hari tua. Sehingga 15 September 2019, seramai 98,619 peserta telah memperoleh manfaat daripada program bantuan bersasar ini, iaitu mendapat insentif khas berjumlah RM40 sebulan atau RM480 setahun. Daripada jumlah tersebut seramai 16,461 wanita termasuk ibu tunggal di Sarawak telah menerima bantuan melalui insentif i-Suri ini.

Selain itu, JPW telah menjalankan pelbagai program psiko pendidikan sepanjang tahun di 15 buah negeri seluruh negara termasuklah Sarawak ke arah memberi kesedaran serta celik undang-undang dalam menangani kes berkaitan. Antara program yang dijalankan oleh JPW adalah seperti berikut :

- i. Perkhidmatan kaunseling motivasi
- ii. Klinik Guaman,
- iii. Klinik D'Stress;
- iv. Program Wanita Anti Jenayah (WAJA); dan
- v. Kempen menangani keganasan terhadap wanita sepanjang tahun

JPW juga turut melatih kumpulan wanita dalam komuniti dengan ilmu asas kaunseling yang dikenali dengan kumpulan *Lay Counselor*. Kumpulan ini merupakan sukarelawan barisan hadapan membantu komuniti yang mengalami pelbagai masalah termasuklah keganasan dalam rumah tangga.

Klinik Guaman dilaksanakan dengan membincangkan isu-isu berkaitan dan tindakan dari sudut undang-undang yang boleh diambil oleh wanita dan ibu tunggal. Program WAJA pula dilaksanakan melalui seminar dan ceramah bertujuan untuk memberi pengetahuan dan kesedaran kepada masyarakat khususnya mengenai jenayah. Manakala Kempen Menangani Keganasan Terhadap Wanita turut dilaksanakan sepanjang tahun dan secara berterusan di setiap program-program JPW. Kempen ini mengumpulkan tandatangan orang ramai sebagai tanda sokongan menolak keganasan terhadap wanita.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 3 DISEMBER 2019 (SELASA)

SOALAN NO. 27

Minta **MENTERI PENDIDIKAN** menyatakan apakah status dan kaedah pelaksanaan program sarapan untuk murid-murid yang akan bermula pada tahun 2020.

JAWAPAN

Tuan Yang di-Pertua,

Pertanyaan ini telah dijawab serentak pada 9 Oktober 2019.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' SERI TIONG KING SING [BINTULU]

TARIKH : 3 DISEMBER 2019 (SELASA)

SOALAN NO. 28

Minta **MENTERI PENDIDIKAN** menyatakan adakah masalah pengangguran graduan adalah disebabkan penawaran program pengajian di Institut Pengajian Tinggi (IPT) dan kerjasama akademik-industri serta apakah langkah-langkah untuk mengatasinya.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) komited dalam memastikan graduan berupaya untuk memenuhi keperluan sektor guna tenaga negara pada masa kini dan akan datang. Antara langkah yang senantiasa dilaksanakan adalah dengan memastikan program atau modul yang ditawarkan oleh institusi pengajian tinggi (IPT) termasuk Politeknik, Kolej-kolej Komuniti dan Kolej-kolej Vokasional sentiasa relevan dan mengikut keperluan guna tenaga semasa.

Proses penilaian program-program akademik yang ditawarkan oleh IPT sentiasa dilaksanakan dengan mengambil kira input daripada industri bagi tujuan penjumudan, pembekuan dan pelupusan program-program akademik yang tidak lagi relevan dengan keperluan industri.

Selain itu, kerjasama dengan pihak industri melalui program *Intergrated Graduate Employability Structured Program* (IGESP) juga terus dipertingkatkan bagi membantu meningkatkan kebolehpasaran graduan, bahkan Kementerian mengalu-alukan penglibatan mereka di peringkat awal pembangunan program dan modul akademik yang hendak ditawarkan oleh IPT. Kerjasama ini amat kritikal untuk memastikan bahawa program-program akademik yang ditawarkan oleh IPT bersifat *industry driven* dan merupakan program yang dapat membentuk graduan untuk memenuhi keperluan semasa industri dan akan datang.

KPM dengan kerjasama universiti awam (UA) telah melaksanakan transformasi pendidikan tinggi awam melalui semakan semula kurikulum program akademik agar relevan dan terkini serta selaras dengan kemajuan teknologi IR4.0. Bermula tahun 2017, UA telah menjalankan semakan semula terhadap program-program akademik yang ditawarkan. Melalui semakan tersebut UA telah mengenal pasti program akademik yang perlu dijumudkan, dibekukan atau dilupuskan bagi memberi laluan kepada penawaran program baharu yang memenuhi keperluan Industri dan serta sejajar dengan keperluan IR4.0.

Di samping itu jua, KPM turut melaksanakan saringan awal yang ketat terhadap setiap program akademik yang hendak ditawarkan oleh UA. Pihak UA mestilah menjalankan kajian analisis yang terperinci terhadap program-program akademik yang hendak ditawarkan, supaya hanya program yang menjadi fokus dan keperluan guna tenaga negara sahaja yang ditawarkan. Manakala, program akademik yang dikekalkan dalam sistem penawaran adalah program yang menepati aspek keperluan tenaga negara, laluan kerjaya dan tahap kebolehpasaran graduan, tiada duplikasi program akademik sedia ada dalam kalangan IPT, implikasi kewangan, perjawatan dan fizikal serta perkembangan polisi dan dasar terkini negara berkaitan bidang pendidikan tinggi agar relevan , berdaya saing serta memenuhi keperluan industri semasa selari dengan IR 4.0

Kementerian melalui Jabatan Pendidikan Tinggi sentiasa memastikan bahawa pengisian pembelajaran di peringkat universiti adalah selari dengan permintaan pasaran pekerjaan dan keperluan industri. Pelbagai program kerjasama yang terjalin antara pihak industri dan kementerian dengan bermatlamat ke arah meningkatkan kebolehpasaran graduan telah dilaksanakan dan berfokus kepada program berimpak tinggi.

Antaranya adalah melalui pengenalan *Academia Talent Exchange Programme* (AI-xChange) :*CEO@ Faculty Programme*, di mana pelajar-pelajar didedahkan dengan perkongsian pengalaman dan kemahiran kolaborasi antara akademik dan pihak industri, melalui syarahan dan slot interaksi dengan pelbagai tokoh syarikat-syarikat berkaitan kerajaan (GLC) dan industri-industri terkemuka antarabangsa serta tempatan. Pada tahun 2019, program ini telah berjaya mendapat penyertaan seramai 64 orang CEO yang terdiri daripada pelbagai sektor industri.

Antara keberhasilan dan impak dalam pengajaran dan pembelajaran melalui *Academia Talent Exchange Programme* (AI-xChange) :*CEO@ Faculty Programme* adalah mahasiswa berpeluang memahami dunia sebenar melalui perkongsian pengalaman CEO daripada segi pengurusan pentadbiran, kepimpinan dan teknologi di lapangan. Perkongsian amalan terbaik dari sudut pandangan CEO membolehkan pelajar berfikir lebih kreatif dan inovatif serta berupaya berfikir di luar kotak, seterusnya mewujudkan pembelajaran lebih holistik. Ini akan dapat meningkatkan kebolehpasaran graduan dan mengurangkan ketidaksepadanan di dalam penawaran dan permintaan pasaran kerja. Selain itu juga, integrasi dan sinergi antara tenaga pakar industri dengan penyelidik universiti dan pelajar dapat diwujudkan. IPT juga berjaya beralih daripada beroperasi secara bersendirian kepada *quadruple helix* iaitu ekosistem inovasi yang saling berkaitan antara akademik, industri, kerajaan dan komuniti yang telah membentuk perkongsian sumber untuk pembangunan negara.

KPM melalui Jabatan Pendidikan Politeknik dan Kolej Komuniti (JPPKK) sentiasa memastikan kualiti dalam perkhidmatan TVET menjangkau tahap standard yang ditetapkan oleh badan akreditasi seperti Agensi Kelayakan Malaysia (MQA), dan badan akreditasi dan

profesional yang lain seperti Majlis Akreditasi Kejuruteraan Teknologi (ETAC) di bawah Lembaga Jurutera Malaysia, Malaysian Board of Technologist (MBOT), Lembaga Juruukur Tanah (LJT), Lembaga Arkitek Malaysia (LAM), International Maritime Organisation (IMO), Asia Pacific Accreditation and Certification Commission (APACC) dan sebagainya. Agensi-agensi ini telah menetapkan standard piawaian akreditasi bagi program dan institusi yang perlu dicapai dalam memastikan kualiti graduan yang dihasilkan benar-benar berkualiti.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI HASANUDDIN BIN MOHD YUNUS
(HULU LANGAT)**

TARIKH : 3 DISEMBER 2019 (SELASA)

SOALAN

Minta **MENTERI PERTAHANAN** menyatakan adakah Kerajaan mempunyai rancangan untuk membeli atau menggantikan 6 buah helikopter MD530G bernilai RM300 juta yang tidak diterima oleh Kementerian Pertahanan khusus untuk digunakan di Pantai Timur Sabah yang sangat terdedah kepada pencerobohan. Jika ya, mungkinkah model baru nanti sesuai untuk dioperasikan di kawasan maritim.

JAWAPAN

Tuan Yang di-Pertua,

Kementerian Pertahanan buat masa ini dalam fasa penelitian akhir untuk memuktamadkan hala tuju perolehan helikopter MD530G dan Memorandum Jemaah Menteri telah disediakan untuk dikemukakan bagi mendapatkan ulasan beberapa agensi yang berkaitan sebelum dibentangkan ke Jemaah Menteri.

Rancangan penggantian helikopter MD530G akan diputuskan setelah keputusan/hala tuju perolehan helikopter ini dimuktamadkan.

Sementara itu, keselamatan di Pantai Timur Sabah mampu dilaksanakan oleh Tentera Darat menggunakan pesawat A109 *Light Observation Helicopter* dan aset-aset sedia ada yang lain.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

TARIKH : 3 DISEMBER 2019 (SELASA)

SOALAN NO. 30

Minta **MENTERI PENDIDIKAN** menyatakan

- (a) apakah pendirian Kementerian berkenaan cadangan memperkenalkan seni khat dan tulisan jawi bagi mata pelajaran Bahasa Melayu tahun empat menjelang tahun hadapan; dan
- (b) adakah terdapat sebarang perbincangan yang telah diadakan di antara Kementerian bersama pertubuhan pendidikan Cina dan India bagi meredakan keresahan mereka berhubung keputusan Kementerian memperkenalkan seni khat dan tulisan jawi bagi mata pelajaran Bahasa Melayu.

JAWAPAN

Tuan Yang di-Pertua,

- (a) Kementerian Pendidikan Malaysia (KPM) akan meneruskan pengajaran tulisan jawi pada tahun 2020 bagi murid Tahun 4 seperti yang dirancang dengan membuat beberapa penambahbaikan berdasarkan keputusan Jemaah Menteri pada 14 Ogos 2019 berkaitan pernyataan standard pembelajaran dalam Dokumen Standard Kurikulum dan Pentaksiran (DSKP) mata pelajaran Bahasa Melayu.

Antara matlamat pengajaran dan pembelajaran tulisan jawi dan khat di sekolah adalah bagi memastikan tulisan jawi dimartabatkan sebagai sejarah warisan negara dan seterusnya diperkasakan dalam kalangan murid berbilang bangsa.

- (b) Menyentuh tentang sesi perbincangan dengan persatuan pendidikan Cina dan India, KPM ingin memaklumkan bahawa beberapa sesi pertemuan dan perbincangan berkaitan seni khat dan tulisan jawi telah diadakan antara KPM dengan Pertubuhan Pendidikan Cina dan India bagi meredakan keresahan mereka.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : TUAN WONG CHEN (SUBANG)

TARIKH : 3 DISEMBER 2019

SOALAN

TUAN WONG CHEN [SUBANG] minta **MENTERI DALAM NEGERI** menyatakan bilakah pihak kementerian akan meminda Akta Mesin Cetak dan Penerbitan 1984 untuk membenarkan kebebasan akhbar yang lebih besar di Malaysia.

JAWAPAN

Tuan Yang Di Pertua,

Kebebasan bersuara dan mengeluarkan pendapat adalah dilindungi oleh Perlembagaan Persekutuan. Ianya adalah asas penting kepada kewujudan sesebuah negara demokrasi yang moden. Ini termasuklah kebebasan melaporkan berita, kenyataan dan penerangan di dalam akhbar dan medium-medium yang lain. Walau bagaimanapun, ini tidak bermakna sebarang laporan dan kenyataan wajar dibenarkan untuk disiarkan dengan bebas secara mutlak bagi menjaga keharmonian dan sensitiviti masyarakat majmuk di negara ini.

Sejurus selepas Pilihan Raya Umum ke-14 (PRU-14), Kementerian Dalam Negeri (KDN) telah mengambil inisiatif untuk mengkaji dan meneliti semula undang-undang berkaitan keselamatan yang dilihat oleh sesetengah pihak bersifat menekan dan zalim. Ini selari dengan Janji 27, Manifesto Pakatan Harapan yang dibentuk oleh Kerajaan Pakatan Harapan. Enam (6)

SOALAN NO : 31

akta yang dikaji adalah Akta Pencegahan Jenayah 1959 (POCA), Akta Pencegahan Keganasan 2015 (POTA), Akta Kesalahan Keselamatan (Langkah-langkah Khas) 2012 (SOSMA), Akta Hasutan 1948, Akta Mesin Cetak dan Penerbitan (AMCP) 1984 dan Akta Perhimpunan Aman (APA) 2012.

Untuk makluman Yang Berhormat, APA 2012 telah dibentangkan pada sesi parlimen yang lalu, manakala lima (5) akta lain akan menyusul mengikut keutamaan. Bagi AMCP 1984, kajian di peringkat Jawatankuasa Khas dan Jawatankuasa Teknikal Kajian Undang-undang Berkaitan Keselamatan telah selesai. Semua input dan pandangan yang telah diperoleh daripada pihak berkepentingan dalam Jawatankuasa tersebut telah diambil kira. Satu (1) Kertas Jemaah Menteri Mengenai Kajian AMCP 1984 akan dikemukakan kepada Jemaah Menteri setelah penelitian kajian dimuktamadkan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG SAUNI
[SIBUTI]**

TARIKH : 3 DISEMBER 2019 (SELASA)

SOALAN

Minta **MENTERI PENDIDIKAN** menyatakan berapakah jumlah tawaran melanjutkan pelajaran ke IPTA bagi sesi tahun 2019 bagi pengambilan diploma dan sarjana muda seluruh Malaysia mengikut pecahan setiap negeri dan berapa jumlah pelajar yang tidak melaporkan diri setelah menerima tawaran ke IPTA.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) melalui Bahagian Kemasukan Pelajar IPTA (BKPA) , Jabatan Pendidikan Tinggi bertanggungjawab untuk mengurus dan menyelaraskan kemasukan pelajar ke program Sijil, Asasi, Diploma dan Sarjana Muda di universiti awam (UA), Politeknik, Kolej Komuniti dan Institusi Latihan Kemahiran Awam (ILKA).

Jumlah keseluruhan pelajar yang ditawarkan ke Program Sarjana Muda Sesi Akademik 2019/2020 ialah **56,759** orang dengan pecahan penawaran mengikut negeri adalah seperti berikut:

1. Negeri Johor seramai 6,807;
2. Negeri Kedah seramai 4,742;

3. Negeri Kelantan seramai 5,064;
4. Negeri Melaka seramai 1,746;
5. Negeri Sembilan seramai 2,201;
6. Negeri Pahang seramai 3,101;
7. Negeri Pulau Pinang seramai 3,055;
8. Negeri Perak seramai 5,329;
9. Negeri Perlis seramai 566;
10. Negeri Selangor seramai 8,045
11. Negeri Terengganu seramai 3,315;
12. Negeri Sabah seramai 6,120;
13. Negeri Sarawak seramai 4,582;
14. Wilayah Persekutuan Kuala Lumpur seramai 1,783;
15. Wilayah Persekutuan Labuan seramai 145;
16. Wilayah Persekutuan Putrajaya seramai 157; dan
17. Lain-lain (luar negara) seramai seorang.

Daripada jumlah tersebut, sebanyak **88 peratus (50,155)** calon yang ditawarkan ke Program Sarjana Muda telah mendaftar di IPTA, manakala selebihnya iaitu sebanyak **12 peratus (6,604)** telah tidak mendaftar.

Berhubung dengan Program Diploma pula, jumlah keseluruhan pelajar yang ditawarkan ke Program Diploma bagi Sesi Akademik 2019/2020 ialah **96,703** orang dengan pecahan penawaran mengikut negeri adalah seperti berikut:

1. Negeri Johor seramai 11,256;
2. Negeri Kedah seramai 9,266;
3. Negeri Kelantan seramai 8,677;
4. Negeri Melaka seramai 2,993;
5. Negeri Sembilan seramai 4,260;
6. Negeri Pahang seramai 5,857;

7. Negeri Pulau Pinang seramai 4,044;
8. Negeri Perak seramai 7,867;
9. Negeri Perlis seramai 1,000;
10. Negeri Selangor seramai 17,736;
11. Negeri Terengganu seramai 6,158;
12. Negeri Sabah seramai 6,210;
13. Negeri Sarawak seramai 7,267;
14. Wilayah Persekutuan Kuala Lumpur seramai 3,445;
15. Wilayah Persekutuan Labuan seramai 223;
16. Wilayah Persekutuan Putrajaya seramai 441; dan
17. Lain-lain (luar negara) seramai tiga orang.

Daripada jumlah tersebut, sebanyak 47 peratus (45,225) calon yang ditawarkan ke Program Diploma telah mendaftar di IPTA, manakala selebihnya iaitu sebanyak 53 peratus (51,478) telah tidak mendaftar.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : TUAN WONG CHEN [SUBANG]

TARIKH : 3 DISEMBER 2019 (SELASA)

SOALAN NO. 33

Minta **MENTERI PENDIDIKAN** menyatakan nyatakan jika kementerian anda akan meningkatkan bilangan kerani untuk membantu guru-guru sekolah kepada nisbah 1:10.

JAWAPAN

Tuan Yang di-Pertua,

Kementerian Pendidikan Malaysia (KPM) mengambil perhatian yang utama terhadap inisiatif menangani beban tugas guru. Bagi tujuan tersebut, pada tahun 2019 KPM telah meluluskan sebanyak 10 inisiatif menangani beban tugas guru. Berkaitan dengan cadangan menambah nisbah kerani atau Anggota Kumpulan Pelaksana, KPM ingin memaklumkan bahawa pewujudan jawatan Anggota Kumpulan Pelaksana kategori Pembantu Tadbir (Perkeranian/Operasi) di sekolah adalah berdasarkan kepada norma perjawatan yang telah ditetapkan dengan mengambil kira saiz sekolah dan enrolmen murid. Kementerian walau bagaimanapun akan meneliti norma perjawatan dari semasa ke semasa berdasarkan Dasar Norma Perjawatan yang ditetapkan oleh Agensi Pusat.

Untuk makluman, selain Pembantu Tadbir (Perkeranian/Operasi) terdapat beberapa kategori jawatan Anggota Kumpulan Pelaksana lain yang telah diwujudkan di sekolah iaitu Pembantu Tadbir (Kewangan), Pembantu Makmal, Penyelia Asrama, Pembantu Pengurusan Murid dan Pemandu.

KPM ingin menyampaikan rasa penghargaan kepada semua guru di Malaysia yang sentiasa menganggap tugas mendidik sebagai amanah dan bukan sebagai beban demi kemenjadian murid dan pembangunan negara Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATUK ROBERT LAWSON CHUAT [BETONG]

TARIKH : 3.12.2019 (SELASA)

SOALAN

**Datuk Robert Lawson Chuat [Betong] minta MENTERI
PERDAGANGAN DALAM NEGERI DAN HAL EHWAL PENGGUNA
menyatakan :-**

- (a) senarai lapan syarikat yang telah diberi permit mengimport gula dari luar negara; dan
- (b) kesan positif kepada pengguna semenjak kelulusan lapan permit kepada pengeluar makanan dan minuman di Sarawak untuk mengimport gula dari luar negara.

JAWAPAN

Tuan Yang di-Pertua,

Untuk makluman, terdapat lapan (8) syarikat pengeluar makanan dan minuman di Sarawak yang telah diluluskan AP import gula bertapis pada tahun 2019.

Sehingga kini, terdapat dua (2) syarikat yang telah membawa masuk gula bertapis melalui AP import gula yang telah diluluskan iaitu Sunshine Food Manufacturer Co Sdn Bhd dan Foodtake Industries Sdn. Bhd.

Antara kesan positif daripada pemberian AP import gula bertapis kepada pengeluar makanan dan minuman adalah:

- 1) harga produk makanan atau minuman yang dihasilkan oleh syarikat-syarikat penerima AP boleh dikurangkan untuk dijual di pasaran tempatan atau dieksport;
- 2) tawaran harga produk yang lebih murah kepada rakyat tempatan dan membantu mengurangkan kos sara hidup; dan
- 3) memberi kelebihan kepada produk keluaran tempatan untuk lebih kompetitif untuk bersaing di pasaran eksport.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN LIM LIP ENG [KEPONG]

TARIKH : 3 DISEMBER 2019 (SELASA)

SOALAN NO. 35

Minta **MENTERI PENDIDIKAN** menyatakan usaha Kerajaan untuk membantu golongan muda menguasai Bahasa Inggeris selari dengan keperluan semasa dan supaya negara kekal kompetitif terutama dalam bidang sains dan matematik.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa sedar akan kepentingan bahasa Inggeris sebagai salah satu kemahiran yang perlu ada dalam diri murid dan mahasiswa terutama dalam era revolusi industri 4.0. Di peringkat sekolah, bagi menyokong pelaksanaan KSSM dan KSSR (semakan) tahun 2019 serta Dasar Memartabatkan Bahasa Melayu dan Memperkukuhkan Bahasa Inggeris, KPM telah melaksanakan pelbagai inisiatif, antaranya ialah:

1. Usaha Sama KPM dan Cambridge English (2016-2020)

Melalui usaha sama ini pelbagai perubahan secara sistematik dan sistemik dilaksanakan terhadap pendidikan bahasa Inggeris. Salah satu daripada usaha ini melibatkan penjajaran kurikulum Bahasa Inggeris, pentaksiran, latihan guru dan bahan sumber diajarkan kepada piawaian antarabangsa *Common European Framework of Reference for Languages* (CEFR). Usaha Sama ini adalah berdasarkan Pelan Pembangunan Pendidikan Bahasa Inggeris yang

dikenali sebagai *The Roadmap for English Language Education in Malaysia* 2015–2025. Pelan ini memperincikan perubahan dalam pendidikan Bahasa Inggeris pada peringkat prasekolah sehingga universiti termasuk pendidikan guru.

Dokumen Standard Kurikulum dan Pentaksiran (DSKP) Bahasa Inggeris bagi prasekolah, sekolah rendah dan sekolah menengah yang diwajibkan kepada CEFR telah menetapkan sasaran yang perlu dikuasai oleh murid. Berdasarkan sasaran tersebut, guru melaksanakan pengajaran dan pembelajaran serta pentaksiran bilik darjah yang bersesuaian mengikut kehendak DSKP dan tahap sasaran kurikulum (*curriculum target levels*).

2. Inisiatif 107: Pengukuhan Pendidikan Bahasa Inggeris di bawah Pelan Pembangunan Pendidikan Malaysia (PPPM) 2013-2025:

Pelbagai program dan aktiviti pengukuhan bahasa Inggeris telah dirancang dan dilaksanakan selaras dengan the English Language Roadmap 2013-2025. Empat program utama di bawah Inisiatif Pengukuhan Pendidikan Bahasa Inggeris termasuk *Highly Immersive Programme* (HIP), *Dual Language Programme* (DLP), Program Peningkatan Kemahiran Bahasa Inggeris di Sekolah (PPKBIS) dan *Profesional Up-skilling of English Language Teachers* (Pro-ELT).

Pada tahun 2019, KPM berusaha memantapkan lagi pelaksanaan HIP di sekolah bagi mengukuhkan penggunaan bahasa Inggeris dalam kalangan murid melalui:

1. Program Bimbingan Bahasa Inggeris Sekolah di bawah HIP; dan
2. Program Gerak Jangkau Bahasa Inggeris di bawah HIP

Selain daripada itu, KPM dan universiti awam (UA) telah melaksanakan beberapa inisiatif bagi meningkatkan penguasaan Bahasa Inggeris di kalangan graduan:

1. Penawaran kursus-kursus kemahiran bahasa Inggeris yang sesuai bagi meningkatkan kemahiran pelajar dalam bahasa tersebut.

Jumlah jam kredit serta jenis kursus yang ditawarkan kepada setiap pelajar adalah berdasarkan keputusan pelajar tersebut di dalam Malaysia University English Test (MUET) yang diambil sebelum memasuki universiti awam (UA);

2. Menggalakkan penggunaan bahasa Inggeris di dalam sesi tutorial, pembentangan kertas kerja serta pembentangan kertas projek tahun akhir dan lain-lain sesi pembelajaran tidak formal;
3. Menawarkan kursus-kursus elektif bahasa Inggeris sebagai kursus pilihan untuk pelajar;
4. Menggalakkan pelajar lemah untuk mengikuti kursus jangka pendek/klinik bahasa semasa cuti semester; dan
5. Menggalakkan aktiviti ko-kurikulum di dalam bahasa Inggeris seperti melaksanakan minggu/bulan bahasa Inggeris, English Language Camp serta beberapa program lain yang dilaksanakan oleh persatuan-persatuan pelajar dari masa ke semasa.

KPM juga telah memperkenalkan Malaysia English Assessment (MEA) untuk memperkasakan Ekosistem untuk Pembelajaran dan Pentaksiran Bahasa Inggeris di peringkat Pendidikan Tinggi. MEA merupakan satu ekosistem yang unik dan holistik di mana ia akan mengubah lanskap pembelajaran dan pengalaman pelajar dalam menguasai Bahasa Inggeris. Integrasi pembelajaran dan penilaian secara formal dan tidak formal mampu melahirkan graduan yang melalui pengajaran dan pembelajaran mengikut standard antarabangsa iaitu Common European Framework of Reference (CEFR) selepas tamat pengajian. Aspirasi ini mampu meningkatkan kebolehpasaran graduan serta dapat memastikan graduan menepati keperluan industri.

UA turut memperkenalkan Pakej Pengukuhan Bahasa Inggeris yang seperti English Language Experience (ELEEx) di UPM, Competency Based English Test (CBET) di UKM dan English Placement Test (EPT) di Universiti Islam Antarabangsa (UAIM) untuk membantu memantapkan penguasaan Bahasa Inggeris pelajar. Manakala Rangkaian Kolej Universiti Teknikal Malaysia/ Malaysia Technical

University Network atau dikenali sebagai MTUN yang mengkhususkan pembelajaran bidang teknikal sememangnya menggunakan Bahasa Inggeris sebagai bahasa pengantara dalam pengajaran dan pembelajaran serta -aktiviti berkaitan akademik termasuk pengajaran bagi program berkaitan sains atau matematik. Pada masa yang sama UA juga melaksanakan pelbagai intervensi bagi meningkatkan tahap kompetensi Bahasa Inggeris pelajar.

KPM melalui Jabatan Pendidikan Politeknik dan Kolej Komuniti (JPPKK), komited dalam memastikan kemampanan Bahasa Inggeris dalam kalangan pelajar politeknik dan kolej komuniti melalui *English Direction for Polytechnic and Community Colleges (2019-2023)*. Beberapa langkah yang dilaksanakan adalah seperti berikut:

1. Kurikulum Bahasa Inggeris yang memantapkan penguasaan Bahasa Inggeris di kalangan pelajar Politeknik dan Kolej Komuniti. Di antara kursus yang ditawarkan ialah *Communicative English*, *Technical English*, *Maritime English* dan *Workplace English*.
2. Penglibatan industri yang aktif dan berterusan. Pihak industri terlibat dalam penggubalan kurikulum Bahasa Inggeris supaya hasil pembelajaran kurikulum sentiasa relevan dengan keperluan industri. Kurikulum Bahasa Inggeris di Politeknik dan Kolej Komuniti juga melibatkan pihak industri dalam proses semak semula yang dilaksanakan mengikut kohort ambilan pelajar. Industri juga dilibatkan dalam memberi pendedahan industri dalam kursus Bahasa Inggeris seperti *Job Hunting Skills*.

Kurikulum Politeknik dan Kolej Komuniti adalah bersifat responsif terhadap kehendak industri sebagai pemegang taruh supaya graduan yang dilahirkan adalah kompetitif dan relevan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE DUA,
PARLIMEN EMPATBELAS**

PERTANYAAN : JAWAB LISAN

DARIPADA : YB DATUK RONALD KIANDEE (BELURAN)

TARIKH : 3 DISEMBER 2019

SOALAN

DATUK SERI DR. RONALD KIANDEE [BELURAN] minta **MENTERI DALAM NEGERI** menyatakan apakah pendirian Kerajaan Malaysia dalam isu melibatkan bekas rakyat Malaysia yang telah melucutkan kerakyatan mereka kerana percaya bahawa pasport British Overseas Citizen (BOC) membolehkan mereka diberi kerakyatan automatik di United Kingdom namun kini terkandas dan dikategorikan sebagai stateless di negara tersebut.

JAWAPAN

Tuan Yang Di Pertua,

Sebagaimana sedia maklum, pemegang passport British Overseas Citizen (BOC) merupakan bekas warganegara yang telah melepaskan kewarganegaraan Malaysia dan memohon kewarganegaraan Britain. Walau bagaimanapun, permohonan mereka gagal kerana tidak mematuhi syarat di bawah Undang-Undang Kerakyatan Britain 1981.

Untuk makluman Ahli Yang Berhormat, sejak 1 Julai 2013, Kerajaan Malaysia telah melaksanakan inisiatif untuk membantu memudahkan proses bagi pemegang BOC kembali ke Malaysia seperti berikut:

- (i) mengadakan perbincangan dengan Kerajaan British berhubung prosedur kepulangan;
- (ii) menyediakan kemudahan imigresen bagi memastikan pemegang passport BOC boleh berada di Malaysia secara sah;
- (iii) menyediakan kaunter khas di KLIA bagi memudahkan mereka melapor diri sebaik sahaja tiba di Malaysia;
- (iv) menempatkan Pegawai imigresen khas di KLIA yang berperanan membantu pemegang passport BOC; dan
- (v) memberikan khidmat nasihat sebelum dan selepas kepulangan melalui Atase Imigresen di United Kingdom serta Pegawai-pegawai di Jabatan Imigresen Malaysia dan Kementerian Dalam Negeri.

Kesemua pemegang passport BOC yang ingin pulang ke Malaysia perlu memohon dan akan dikeluarkan dengan Pas Residen selaras dengan Peraturan 16A, Peraturan-Peraturan Imigresen 1963.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE DUA,
PARLIMEN EMPATBELAS**

PERTANYAAN : JAWAB LISAN

**DARIPADA : YB DATO' JOHARI BIN ABDUL (SUNGAI
PETANI)**

TARIKH : 3 DISEMBER 2019

SOALAN

DATO' JOHARI BIN ABDUL [SUNGAI PETANI] minta **MENTERI
DALAM NEGERI** menyatakan adakah Kerajaan bercadang meratifikasi
Konvensyen Antarabangsa bagi Perlindungan Semua Orang Daripada
Kehilangan Yang Dipaksa (ICPPED), dan adakah Kerajaan akan mengakui
bahawa kehilangan paksa wujud di Malaysia.

JAWAPAN

Tuan Yang Di Pertua,

Pada masa ini, Kementerian ini masih menjalankan kajian terperinci terhadap keseluruhan peruntukan-peruntukan di dalam Konvensyen Antarabangsa bagi Perlindungan Semua Orang Daripada Kehilangan Yang Dipaksa (ICPPED) dan seterusnya akan menyelaraskan dengan agensi Keselamatan dan penguatkuasa undang-undang yang berkenaan untuk menentukan sama ada terdapat sebarang pecanggahan di antara peruntukan ICPPED dengan undang-undang negara termasuk prosedur kerja sebelum membuat syor kepada Kerajaan.

Berkenaan dakwaan kehilangan paksa wujud di Malaysia yang mengaitkan penglibatan pihak PDRM, Kementerian ini memandang serius laporan tersebut dan telah menubuhkan pasukan petugas khas (PPK) ke atas laporan pendengaran siasatan awam SUHAKAM mengenai kes kehilangan Raymond Koh dan Amri Che Mat. Pasukan ini ditubuhkan dan berkuatkuasa mulai 1 Julai 2019 dan diberikan masa selama enam bulan untuk menjalankan siasatan sebelum laporan dibentangkan kepada Kerajaan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATO' SERI HAJI ABDUL HADI BIN
AWANG (MARANG)**

TARIKH : 3 DISEMBER 2019

SOALAN

DATO' SERI HAJI ABDUL HADI BIN AWANG [MARANG] minta **MENTERI DALAM NEGERI** menyatakan apakah pendirian Kerajaan berkenaan cadangan untuk meminda Perkara 14 Perlembagaan Persekutuan bagi membolehkan ibu yang berwarganegara Malaysia mendapatkan status kewarganegaraan bagi anak mereka yang dilahirkan di luar negara secara automatik.

JAWAPAN

Tuan Yang Di Pertua,

Kementerian mengambil maklum mengenai cadangan untuk meminda Perkara 14 Perlembagaan Persekutuan seperti yang dibangkitkan oleh Ahli Yang Berhormat. Walau bagaimanapun, Kementerian Dalam Negeri (KDN) perlu membuat kajian dan penelitian lanjut ke atas perkara ini selaras dengan peruntukan perundangan sedia ada.

**PEMBERITAHUAN PERTANYAAN JAWAB LISAN DEWAN NEGARA
MESYUARAT KETIGA, PENGGAL KEDUA,
PARLIMEN EMPATBELAS**

PERTANYAAN : JAWAB LISAN

DARIPADA : YB TUAN LIM LIP ENG

TARIKH : 3 DISEMBER 2019

SOALAN

TUAN LIM LIP ENG [KEPONG] minta **MENTERI DALAM NEGERI** menyatakan tindakan Kerajaan dan berapa orang ditangkap dalam laporan baru-baru ini yang bertajuk "RM4,000 sekepala, pekerja Bangladesh mangsa lumayan bagi ejen" di <https://www.malaysiakini.com/news/491442> dan "Setiap hari dua pekerja Bangladesh maut di Malaysia"• di <https://www.malaysiakini.com/news/491616>. Adakah Kerajaan berhasrat menggubal akta baharu seperti Akta Penghambaan Moden (Modern Slavery Act).

JAWAPAN

Tuan Yang Di-Pertua,

Program Penggajian dan Penempatan Semula Pendatang Asing Tanpa Izin (PATI) atau Program *Rehiring* telah tamat pada 30 Jun 2018 tanpa sebarang pelanjutan. Seramai 325,905 orang PATI telah berjaya diputihkan sejak pelaksanaan Program *Rehiring* mulai 15 Februari 2016 untuk bekerja secara sah di negara ini.

Memandangkan Program *Rehiring* telah berakhir tanpa sebarang pelanjutan, Kementerian Dalam Negeri berpandangan bahawa satu isyarat tegas dan jelas hendaklah diperlihatkan kepada pihak berkaitan bahawa tiada lagi kompromi di pihak Kerajaan ke atas mana-mana PATI

dan Majikan yang ingkar dan degil dalam mematuhi undang-undang negara dengan menggaji PATI.

Kementerian juga ingin menegaskan bahawa peluang kepada Majikan untuk menggaji pekerja asing adalah terbuka luas dengan kemudahan permohonan secara dalam talian (*online*) melalui Sistem Permohonan Pekerja Asing Bersepadu (ePPAx) yang telah diperkenalkan. Kadar bayaran juga telah diterapkan secara telus seperti levi, pemeriksaan kesihatan dan sebagainya yang sentiasa dipantau oleh Kerajaan.

Oleh itu, Kementerian menasihatkan kepada Majikan-majikan agar sentiasa mematuhi undang-undang dan peraturan sedia ada dalam menggaji pekerja asing tanpa penglibatan ejen-ejen haram. Pusat Kelulusan Setempat (OSC) yang menempatkan semua agensi-agensi kawal selia bersedia untuk memudahcarakan semua permohonan penggajian pekerja asing bagi memenuhi keperluan dan permintaan ke atas pekerja asing secara teratur.

Selain itu, Kementerian Dalam Negeri melalui Jabatan Imigresen Malaysia (JIM) sedang melaksanakan Program PATI Pulang Ke Negara Asal (Program *Back for Good* - B4G) bertujuan untuk memberi peluang kepada PATI yang telah melakukan kesalahan tinggal lebih masa di bawah Seksyen 15(1)(c) atau tidak memiliki dokumen perjalanan yang sah di bawah Seksyen 6(1)(c) Akta Imigresen 1959/63 untuk pulang ke negara asal secara sukarela mengikut syarat-syarat yang ditetapkan.

Program ini dilaksanakan bermula 1 Ogos 2019 sehingga 31 Disember 2019 di Semenanjung Malaysia sahaja dan melibatkan bayaran kompaun sebanyak RM700 bagi setiap PATI yang menyertai program ini. Warga asing terlibat hendaklah membawa dokumen perjalanan yang sah (pasport dan sijil perjalanan kecemasan) serta tiket untuk pulang ke negara asal dalam tempoh 7 hari. Sekiranya mereka tidak mempunyai pasport yang sah atau langsung tidak mempunyai pasport, mereka perlu merujuk ke kedutaan masing-masing bagi mendapatkan sijil perjalanan kecemasan. Kedutaan akan mengeluarkan sijil perjalanan kecemasan untuk PATI pulang ke negara asal mereka.

Program ini akan dijalankan sepenuhnya oleh JIM di Semenanjung Malaysia sahaja tanpa penglibatan pihak ketiga (vendor atau ejen). JIM telah menyediakan lebih 80 kaunter di Pejabat Imigresen seluruh Semenanjung bagi menjayakan program ini. JIM telah mengadakan sesi libat urus bersama pihak Kedutaan Asing di Malaysia pada 12 Julai 2019 mengenai program ini.

Berdasarkan Akta Antipemerdagangan Orang dan Antipenyeludupan Migran (ATIPSOM) 2007, takrifan pemerdagangan orang merujuk kepada elemen eksploitasi termasuk segala perbuatan yang melibatkan pemerolehan atau pengekalan tenaga kerja atau perkhidmatan seseorang melalui paksaan, dan termasuklah perbuatan merekrut, mengangkut, memindahkan, melindungi, menyediakan atau menerima seseorang. Eksploitasi termasuklah segala bentuk eksploitasi seks, kerja atau perkhidmatan paksa, perhambaan atau amalan yang menyerupai perhambaan, pengabdian, apa-apa aktiviti yang menyalahi undang-undang atau pemindahan organ manusia.

Justeru itu, eksploitasi buruh paksa termasuk indikator keterikatan hutang boleh dikategorikan di bawah tindakan menyalahi undang-undang yang boleh disiasat dan dituduh di bawah Akta ini.